

四庫全書

經部

欽定四庫全書

經部

春秋大全卷三十一

詳校官監察御史<sub>臣</sub>邱庭河

給事中<sub>臣</sub>溫常綬覆勘

總校官知縣<sub>臣</sub>楊懋珩

校對官中書<sub>臣</sub>郭晉

騰錄監生<sub>臣</sub>陳全

欽定四庫全書

春秋大全卷三十一

明 胡廣等 撰

昭公下

癸景王十

十有四年

晉昭四齊景二十衛靈七蔡平二

酉七年

鄭定二曹武二十七卒陳惠二杞

平八年元四秦哀九楚平

王居元年吳夷末十六

春意如至自晉

左傳尊晉罪已也尊晉罪已禮也穀梁傳大夫執則致致則名意如惡然而致見君臣之禮也

按左氏季孫猶在晉子服惠伯私於中行穆子曰魯事晉何以不如夷之小國土地猶大所命能具若為夷棄之使事齊楚何瘳於晉乃歸季孫其始執之為乏邾莒之供而非有扶弱擊強之義也其終歸之為土地猶大所命能具而非有不能救蔡為夷執親之悔也然則晉人喜怒皆以利發其勸沮皆以利行違道甚矣故平丘之會深加貶斥自是而後諸侯不合二十餘年至于召陵又以賄敗十有八國之諸侯而

書侵楚以譏之於是晉日益衰外攜內叛不復振矣

利之能敗人國家乃如此春秋之深戒也

陳氏曰大夫不致必

見執也而後致亦危之也孫氏曰至名不稱氏前見也劉氏曰左氏以舍族為尊晉罪已非也一事再

見卒名爾魯本無罪何罪已之有

附錄

左傳南蒯之將叛也盟費人司徒老祁慮癸偽廢疾使請於南蒯曰臣願受盟而疾興若以君

靈不死請待間而盟許之二子因民之欲叛也請朝衆而盟遂劫南蒯曰羣臣不忘其君畏子以及今年聽命矣子若弗圖費人不忍其君將不能畏子矣子何所不逞欲請送子請期五日遂奔齊侍飲酒於景公公曰叛夫對曰臣欲張公室也子韓皙曰家臣而欲張公室罪莫大焉司徒老祁慮癸來歸費齊侯

使鮑文

子致之

三月曹伯滕卒

夏四月

附錄

左傳夏楚子使然丹簡上國之兵於宗丘且撫其民分貧振窮長孤幼養老疾收介特救災患

宥孤寡赦罪戾詰姦慝舉淹滯禮新叙舊祿勳合親任良物官使屈罷簡東國之兵於召陵亦如之好於邊疆息民五年而後用師禮也

秋葬曹武公

八月莒子去疾卒

在位十四年子郊公嗣左傳秋八月莒著丘公卒郊公不感國人弗順欲立著丘公之弟庚與蒲餘侯惡公子意恢而善於庚與郊公惡公子鐸而善於意恢公子鐸因蒲餘侯而與之謀曰爾殺意恢我出君而納庚與許之

卒自外錄者也莒人來赴故魯史書其卒葬自內錄

者也魯人不往是以闕其葬自昭公以來雖薛杞微

國無不會其葬者

汪氏曰六年葬杞文公二十四年葬杞平公三十一年葬薛獻公

何獨於莒則不往乎方是時意如專政而莒嘗訴其疆鄙取鄭之罪於方伯而見執矣為是怒莒故獨不會其葬也夫怨不棄義惡不忘親怒不廢禮在桓公

時雖與衛戰而宣公卒則往葬之

汪氏曰襄十八年同圍齊十九年猶

葬靈

公不以私故絕吉凶慶弔往來施執之常禮也以

此見意如之專恣矣若意如者其傲狠修怨敢施於昭公與莒子及其在晉聞除館西河則恐懼逃歸如一匹夫何也小人無禮喜怒勇怯不中節皆若是耳

苟不遠之其能國乎

襄陵許氏曰昭公以來微國皆葬而莒著丘公不葬者莒卒無

也謚

附錄

左傳楚令尹子旗有德於王不知度與養氏比而求無厭王患之九月甲午楚子殺闕成然而



滅養氏之族使關辛  
居鄆以無忘舊勲

# 冬莒殺其公子意恢

左傳冬十二月蒲餘侯茲夫殺公子意恢郊公奔齊公  
子鐸逆庚與於齊齊隰黨公子鉏送之有賂田穀梁傳  
言公子而不言大夫莒無大夫也莒無大夫而曰公子  
意恢意恢賢也曹莒皆無大夫其所以無大夫者其義  
異也高郵孫氏曰公穀皆以為曹莒無大夫蓋曹莒小  
國其大夫之位纔當大國之士春秋諸侯之士皆不書  
名故曹莒大夫之名不見於經其有事繫懲勸法當書  
者則雖賤而名之邾庶其黑肱莒牟夷意恢是也陳氏  
曰書殺意恢以非其罪也汪氏曰意恢之死罪累上也  
故以國殺為文而不去其族襄陵許氏曰公子鐸首亂  
而無見焉者韓愈曰春秋書王法不誅其人  
自此類皆所以表見王道若鐸不書者多矣

附錄

左傳晉邢侯與雍子爭鄆田久而無成士景伯如楚叔魚攝理韓宣子命斷舊獄罪在雍子雍

子納其女於叔魚叔魚蔽罪邢侯邢侯怒殺叔魚與雍子於朝宣子問其罪於叔向叔向曰三人同罪施生戮死可也雍子自知其罪而賂以買直鮒也需獄邢侯專殺其罪一也已惡而掠美為昏貪以敗官為墨殺人不可為賊夏書曰昏墨賊殺臯陶之刑也請從之乃施邢侯而尸雍子與叔魚於市仲尼曰叔向古之遺直也治國制刑不隱於親三數叔魚之惡不為末減曰義也夫可謂直矣平丘之會數其賄也以寬衛國晉不為暴歸魯季孫稱其詐也以寬魯國晉不為虐邢侯之獄言其貪也以正刑書晉為不頗三言而除三惡加三利殺親益榮猶義也夫

甲景王十  
戌八年

十有五年

晉昭五齊景二十一衛靈八蔡平  
三鄭定三曹平公須元年陳惠三

紀平九宋元五秦哀十  
楚平二吳夷末十七卒

春王正月吳子夷末卒

二月癸酉有事于武宮籥入叔弓卒去樂卒事

左傳春將禘于武公戒百官梓慎曰禘之日其有咎乎  
吾見赤黑之祲非祭祥也喪氛也其在涖事乎二月癸  
酉禘叔弓涖事籥入而卒去樂卒事禮也公羊傳其言  
去樂卒事何禮也君有事于廟聞大夫之喪去樂卒事  
大夫聞君之喪攝主而往大夫聞大夫之喪尸事畢而  
往穀梁傳君在祭樂之中聞大夫之喪則去樂卒事禮  
也君在祭樂之中大夫有變以聞可乎大夫國體也古  
之人重死君命無所不通

左氏曰禘于武宮

杜氏曰武宮魯武公廟成六年復立

叔弓涖事籥入

而卒去樂卒事有事於宗廟聞大夫之喪則去樂而祭可乎按曾子問君在祭不得成禮者夫子語之詳

矣

禮記曾子問諸侯祭社稷俎豆既陳聞天子崩后之喪君薨夫人之喪孔子曰廢

而無有

及大臣者是知祭而去樂不可也有事於宗廟遭大夫之變則以聞可乎按禮衛有大史柳莊寢疾君曰若疾革雖當祭必告是知祭而以聞不可也禮莫重於當祭大夫有變而不以聞則內得盡其誠敬之心於宗廟外全隱恤之意於大臣是兩得之也然則有

事於宗廟大臣泣事簋入而卒於其所則如之何禮  
雖未之有可以義起也有事於宗廟大臣泣事簋入  
而卒於其所去樂卒事其可也緣先祖之心見大臣  
之卒必聞樂不樂緣孝子之心視已設之饌必不忍  
輕徹故去樂而卒事其可也宗廟合禮者常事不書  
苟以為可則春秋何書乎此記禮之變而書之者也  
家氏曰祭者主於誠慤不貳事者也故當祭雖大夫  
之喪不得以聞衛臣柳莊疾革其君必使以告為之  
變其常也叔弓預於祭猝有疾而死則君為之徹樂  
卒事可也若叔弓自歿於其家如柳莊之比則當待

祭畢而後告不當以卑而廢尊春秋書之記禮之變其常耳此與襄仲之卒去籥其禮不同不可引以為證也高氏曰成六年武宮非禮也此有事于武宮則知自立宮之後祭之如親廟方其祭也而叔弓涖事籥入而卒此豈雉鼎之變而已哉○啖氏曰穀梁言大夫之卒雖當祭禮皆告于君按宗廟大事大夫卒小事以理言之應待祭畢趙氏曰左氏云禘于武宮僖官襄宮蓋見經中禘于莊公以為廟合行之故妄云爾汪氏曰行有事武宮乃春祠之祭而不書祭名者以叔弓之卒去樂卒事變禮而書之非時祭之失故止曰有事而不曰祠也左氏以禘為四時之祭遂誤以為禘耳

## 夏蔡朝吳出奔鄭

左傳楚費無極害朝吳之在蔡也欲去之乃謂之曰王唯信子故處子於蔡子亦長矣而在下位辱必求之吾

助子請又謂其上之人曰王唯信吳故處諸蔡二三子莫之如也而在其上亦難乎弗圖必及於難夏蔡人逐朝吳朝吳出奔鄭王怒曰余唯信吳故寘諸蔡且微吳吾不及此女何故去之無極對曰臣豈不欲吳然而前知其為人之異也吳在蔡蔡必速飛去吳所以翦其翼也杜氏曰朝吳故蔡大夫公孫聲子歸生之子

朝吳蔡之忠臣雖不能存蔡而能復蔡其從於棄疾者謂蔡滅而棄疾必能封之也棄疾以其忠於舊君而信之使居舊國可謂知所信矣則昌為出奔費無極害其寵也無極楚之讒人去朝吳出蔡侯朱喪大子建殺連尹奢屏王耳目使不聰明卒使吳師入郢

辱及宗廟讒人為亂可不畏乎為國有九經而尊賢  
為上勸賢有四事而去讒為首志朝吳出奔而入郢  
之使兆矣然朝吳身居舊國處危疑之地苟有譖之  
者則王不能無動也能以忠信自任而杜讒諂之謀  
則善矣而費無極乃語之曰子亦長矣而在下位辱  
也欲為之請以名利累其心而莫之覺不知亦甚矣  
故特書其出奔以罪吳為後戒也

六月丁巳朔日有食之



附錄

左傳六月乙丑王太子壽  
卒秋八月戊寅王穆后崩

秋晉荀吳帥師伐鮮虞

左傳晉荀吳帥師伐鮮虞圍鼓鼓人或請以城叛穆子弗許左右曰師徒不勤而可以獲城何故不為穆子曰吾聞諸叔向曰好惡不愆民知所適事無不濟或以吾城叛吾所甚惡也人以城來吾獨何好焉賞所甚惡若所好何若其弗賞是失信也何以庇民力能則進否則退量力而行吾不可以欲城而邇姦所喪滋多使鼓人殺叛人而繕守備圍鼓三月鼓人或請降使其民見曰猶有食色姑修而城軍吏曰獲城而不取勤民而頓兵何以事君穆子曰吾以事君也獲一邑而教民怠將焉用邑邑以賈怠不如完舊賈怠無卒棄舊不祥鼓人能事具君我亦能事吾君率義不爽好惡不愆城可獲而民知義所有死命而無二心不亦可乎鼓人告食竭力

盡而後取之克鼓而反不  
戮一人以鼓子戴觀歸

晉滅潞氏甲氏及再伐鮮虞皆用大夫為主將而或

稱人或稱國或稱其名氏何也

汪氏曰宣十二年荀林父滅潞稱晉師宣

十六年士會滅甲氏留吁稱晉人昭十二年荀吳伐鮮虞稱晉此年及定四年五年士鞅伐圍鮮哀六年

趙鞅伐鮮虞皆稱將稱帥師

以殄滅為期而無矜惻之意則稱人

見利忘義而以譎計欺詐行之則稱國以正兵加敵

而不納其叛臣則稱名氏夫稱其名氏非褒之也纔

免於貶爾而春秋用兵禦狄之畧咸見矣

蜀杜氏曰前既外之

今不復貶者春秋擇其重者而為之辭陳氏曰嘗狄  
晉矣則荀吳何以無貶於初伐貶餘實錄而已爾

## 冬公如晉

左傳平丘之會故也臨川吳氏曰平丘之會公不與盟  
大夫被執公既往朝而不見納辱亦甚矣至此又往朝  
焉蓋畏大國不敢以辱為恥也

## 附錄

左傳十二月晉荀躒如周葬穆后籍談為介既  
葬除喪以文伯宴樽以魯壺王曰伯氏諸侯皆

有以鎮撫王室晉獨無有何也文伯揖籍談對曰諸  
侯之封也皆受明器於王室以鎮撫其社稷故能薦  
彝器於王晉居深山戎狄之與鄰而遠於王室王靈  
不及拜戎不暇其何以獻器王曰叔氏而忘諸乎叔  
父唐叔成王之母弟也其反無分乎密須之鼓與其  
大路文所以大蒐也闕鞏之甲武所以克商也唐叔

受之以處參虛匡有戎狄其後襄之二路鉞鉞非分  
彤弓虎賁文公受之以有南陽之田撫征東夏非分  
而何夫有勲而不廢有績而載奉之以土田撫之以  
彝器旌之以車服明之以文章子孫不忘所謂福也  
福祚之不登叔父焉在且昔而高祖孫伯鷹司晉之  
典籍以為大政故曰籍氏及辛有之二子董之晉於  
是乎有董史女司典之後也何故忘之籍談不能對  
賓出王曰籍父其無後乎數典而忘其祖籍談歸以  
告叔向叔向曰王其不終乎吾聞之所樂必卒焉今  
王樂憂若卒以憂不可謂終王一歲而有三年之喪  
二焉於是乎以喪賓宴又求彝器樂憂甚矣且非禮  
也彝器之來嘉功之由非由喪也三年之喪雖貴遂  
服禮也王雖弗遂宴樂以早亦非禮也禮王之大經  
也一動而失二禮無大經矣言以考典典以志經忘  
經而多言舉  
典將焉用之

乙景王十  
亥九年

十有六年

晉昭六年齊景二十二衛靈九年蔡  
平四鄭定四曹平二陳惠四杞平

十宋元六秦哀十一  
楚平三吳僚元年

春

附錄

左傳春王正月公在晉  
晉人止公不書諱之也

齊侯伐徐

左傳二月丙申齊師至于蒲隧徐人行成徐子及鄭人  
莒人會齊侯盟于蒲隧賂以甲父之鼎叔孫昭子曰諸  
侯之無伯害哉齊君之無道也興師而伐遠方會之有  
成而還莫之亢也無伯也夫詩曰宗周既滅靡所止戾  
正大夫離居莫知我肄其是之謂乎襄陵許氏曰景公  
之時吳楚方爭晉既不能遠畧以齊之強務德修政以

通天下之志糾合諸侯復霸可也而區區務爭徐伐莒之利志亦卑矣家氏曰徐之封在齊南鄙桓公之霸楚成伐徐桓公躬率諸侯盟于牡丘次于匡以救之又出偏師伐厲以攻其所必救非但為徐計亦自為齊計今齊景睥睨晉霸而不能志其遠者乃伐徐以為左右望之計視桓公之保徐有愧多矣汪氏曰楚虔之立徐屢從楚伐莒昭十二年以為貳於吳而圖之蓋徐實楚之與國也此年盟蒲隧而遂與齊踰十五年吳卒滅徐則甲父之鼎固不足以保徐之社稷也廬陵李氏曰此為晉伯既衰齊景公爭伯之始事盟而不書春秋不忍絕晉也齊景即位於襄二十五年今二十餘年矣自崔慶相殘之後委政二惠及欒高敗乃始親政不能明政刑以強其國委任陳氏觀晏子之言而景公之自治疎矣乃欲以無政之國爭強圖霸宜其不遂振也晉自重丘以賄故不克有功於齊於是亦坐視而莫較矣

楚子誘戎蠻子殺之

左傳楚子聞蠻氏之亂也與蠻子之無質也使然丹誘戎蠻子嘉殺之遂取蠻氏既而復立其子焉禮也公羊傳楚子何以不名戎蠻相誘君子不疾也曷為不疾若不疾乃疾之也

楚子之誘一也或名或不名者虔欲滅中國而棄疾

討蠻氏謹內外之辨也

范氏曰楚子不名戎蠻子非中國故

蔡侯與蠻

子之見殺一也或名或不名者蔡般弑父與君蠻氏

亂而無質其罪之輕重亦差矣

蘇氏曰楚子誘蔡侯殺之書月書日書名

書地以荆蠻害中國疾之也誘殺戎蠻皆不書同類相殘畧之也家氏曰楚大蠻小皆以子稱以見四夷

雖有大小強弱之不同而於周班皆為子不得擅相侵伐况誘而殺之乎

附錄

左傳三月晉韓起聘于鄭鄭伯享之子產戒曰苟有位於朝無有不共恪孔張後至立於客間

執政禦之適客後又禦之適縣間客從而笑之事畢富子諫曰夫大國之人不可不慎也幾為之笑而不陵我我皆有禮夫猶鄙我國而無禮何以求榮孔張失位吾子之恥也子產怒曰發命之不衷出令之不信刑之頗類獄之放紛會朝之不敬使命之不聽取陵於大國罷民而無功罪及而弗知僑之恥也孔張君之昆孫子孔之後也執政之嗣也為嗣大夫承命以使周於諸侯國人所尊諸侯所知立於朝而祀於家有祿於國有賦於軍喪祭有職受服歸服其祭在廟已有著位在位數世世守其業而忘其所僑焉得恥之辟邪之人而皆及執政是先王無刑罰也子寧以他規我○宣子有環其一在鄭商宣子謁諸鄭伯



子產弗與曰非官府之守器也寡君不知子大叔子羽謂子產曰韓子亦無幾求晉國亦未可以貳晉國韓子不可偷也若屬有讒人交闖其間鬼神而助之以興其凶怒悔之何及吾子何愛於一環其以取憎於大國也盍求而與之子產曰吾非偷晉而有二心將終事之是以弗與忠信故也僑聞君子非無賄之難立而無令名之患僑聞為國非不能事大字小之難無禮以定其位之患夫大國之人令於小國而皆獲其求將何以給之一共一否為罪滋大大國之求無禮以斥之何賡之有吾且為鄙邑則失位矣若韓子奉命以使而求玉焉貪淫甚矣獨非罪乎出一玉以起二罪吾又失位韓子成貪將焉用之且吾以玉賈罪不亦銳乎韓子買諸賈人既成賈矣商人曰必告君大夫韓子請諸子產曰日起請夫環執政弗義弗敢復也今買諸商人商人曰必以聞敢以為請子產對曰昔我先君桓公與商人皆出自周庸次比耦

以父殺此地斬之蓬蒿藜藿而共處之世有盟誓以相信也曰爾無我叛我無强賈母或勾奪爾有利市實賄我勿與知恃此質誓故能相保以至于今今吾子以好來辱而謂敝邑强奪商人是教敝邑背盟誓也母乃不可乎吾子得玉而失諸侯必不為也若大國令而共無藝鄭鄙邑也亦弗為也僑若獻玉不知所成敢私布之韓子辭玉曰起不敏敢求玉以徼二罪敢辭之○夏四月鄭六卿餞宣子于郊宣子曰二三君子請皆賦起亦以知鄭志子驥賦野有蔓草宣子曰孺子善哉吾有望矣子產賦鄭之羔裘宣子曰起不堪也子太叔賦褰裳宣子曰起在此敢勤子至於他人乎子太叔拜宣子曰善哉子之言是不有是事其能終乎子游賦風雨子旗賦有女同車子柳賦蓀兮宣子喜曰鄭其庶乎二三君子以君命貺起賦不出鄭志皆昵燕好也二三君子數世之主也可以無懼矣宣子皆獻馬焉而賦我將子產拜使五卿皆

拜曰吾子靖亂敢不拜德宣子私覲於子產以玉與馬曰子命起舍夫玉是賜我玉而免吾死也敢不藉手以拜

### 夏公至自晉

左傳子服昭伯語季平子曰晉之公室其將遂卑矣君幼弱六卿強而奢傲將因是以習習實為常能無卑乎平子曰爾幼惡識國

左氏曰公如晉平丘之會故也至是始歸者晉人止公其不書諱之也昭公數朝于晉三至于河而不得

入汪氏曰十二年莒人愬取鄭十三年平丘不與盟執意如士文伯辭公二十一年辭將伐鮮虞惟二

十三年有疾乃復又兩得見晉侯又欲討其罪而止

二年辭弔少姜非朝

旃

汪氏曰五年如晉莒人愬受牟夷欲止公范獻子諫乃歸公

其困辱亦甚矣在

易之困曰困亨者因困窮而致亨也

朱子曰困者窮而不能自振之

義身雖困而道則亨也

夫困於心衡於慮而後作徵於色發於

聲而後喻此正憤悱自強之時而夏少康衛文公越

勾踐燕昭王四君子者由此其選也

汪氏曰夏少康事見左傳哀公

元年衛文公事見左傳閔公二年史記句踐保棲於會稽嘗膽報吳燕昭王於破燕之後卑身厚幣以招

賢者用樂毅以敗齊

今昭公安於危辱無激昂勉勵之志即所

謂自暴自棄不可與有為而人亦莫之告矣不亦悲

乎諱而不書深貶之也

汪氏曰公行一百七十有六惟僖公十七年十二月會淮

明年九月書至襄公二十八年十一月如楚明年五月書至昭公去年冬如晉今夏書至皆受制於大國踰三時而始返雖不書晉人止公考其時則微傳而事著矣

### 秋八月己亥晉侯夷卒

左傳秋八月晉昭公卒廬陵李氏曰晉昭立於昭公之十年在位日淺僅有厥慙平丘之會其餘則再伐鮮虞而已李氏曰晉至平昭伯事陵遲隳廢春秋所書皆錄變之大者也孟子曰晉平公之於亥唐弗與共天位也弗與治天職也政在侈家賢者壅棄此其所以削弱不亢與平公五盟六會服齊狄寧東夏平秦亂城淳于晉

祁午數當時之功如此然內有變而不知外有患而不  
悟尚何有功足云哉方桓公之初每患伯權太強而王  
政弱文襄以後王政不必論矣惟恐伯權之不能強也  
權者大物也上不能制而授之下則下強而上弱中國  
不能制而授之外國則外國強而中國弱家有千金之  
利已弗能受呼庸人而分之雖三尺之童弗為豈有尊  
為邦君而授權於大夫此溴梁之會平公所謂內有變  
而不知者也人欲自毀藩籬揖仇讎於庶下而與之干  
櫓此不待智者而知其不可豈有身主夏盟而授權於  
夷狄此宋之盟平公所謂外有患而不悟者也蓋世有  
苟道自便者媮於及身之謀而忘乎後日之害平公則  
謀出於身而害見乎身何其謬歟溴梁之事諸侯在會  
而大夫實主載書是委權以與之也荀偃一怒而十二  
國興戎後五年欒盈之變作曲沃之民惟主欒氏不知  
公室晉幾分國而並立矣宋之盟晉主夏盟而挈諸侯  
以畀楚是棄權以假之也虢之會再讀舊書後八年楚

靈會于申實用齊桓召陵之典晉蓋十年無與國之事  
矣此皆身致之也至於昭公之政則又微矣僅一會大夫  
僅一盟諸侯方楚虔辱於乾谿諸夏庶幾復伯為晉君  
臣者改物屬志憤排警懼以率舊烈猶恐不逮今也四  
方未觀德而虎祁崇侈以啟貳列國未聞信而邾南盛  
兵以示汰平丘雖曰同盟齊敢拒令鄭敢爭承衛病窮  
莧之擾魯困蠻夷之訴坐視諸侯之去而不之顧況能  
駕敵國哉宜乎晉之卑也

## 九月大雩

左傳  
旱也

## 附錄

左傳鄭大旱使屠擊祝款暨拊有事於桑山斬  
其木不雨子產曰有事於山蓺山林也而斬其

木其罪大矣  
奪之官邑

季孫意如如晉

臨川吳氏曰卿共葬事畏晉也

冬十月葬晉昭公

左傳冬十月季平子如晉葬昭公平子曰子服回之言猶信子服氏有子哉

丙景王二十有七年晉頃公去疾元年齊景二十三年衛子十年靈十蔡平五鄭定五曹平三陳惠

五杞平十一宋元七秦哀十二楚平四吳僚二

春小邾子來朝

左傳春小邾穆公來朝公與之燕季平子賦采芣穆公賦芣芣者莪昭子曰不有以國其能久乎汪氏曰三年



小邾穆公來朝至是十有五年再朝于昭公也

# 夏六月甲戌朔日有食之

左傳祝史請所用幣昭子曰日有食之天子不舉伐鼓於社諸侯用幣于社伐鼓於朝禮也平子禦之曰止也惟正月朔慝未作日有食之於是乎有伐鼓用幣禮也其餘則否太史曰在此月也日過分而未至三辰有災於是乎百官降物君不舉辟移時樂奏鼓祝用幣史用辭故夏書曰辰不集于房瞽奏鼓嗇夫馳庶人走此月朔之謂也當夏四月是謂孟夏平子弗從昭子退曰夫子將有異志不君君矣杜氏曰正月建巳正陽之月於周為六月於夏為四月

## 秋鄆子來朝

左傳公與之宴昭子問焉曰少皞氏鳥名官何故也鄭子曰吾祖也我知之昔者黃帝氏以雲紀故為雲師而雲名炎帝氏以火紀故為火師而火名共工氏以水紀故為水師而水名大皞氏以龍紀故為龍師而龍名我高祖少皞摯之立也鳳鳥適至故紀於鳥為鳥師而鳥名鳳鳥氏歷正也玄鳥氏司分者也伯趙氏司至者也青鳥氏司啓者也丹鳥氏司閉者也祝鳩氏司徒也鵲鳩氏司馬也鴈鳩氏司空也爽鳩氏司寇也鵲鳩氏司鳩氏司馬也鴈鳩氏司空也爽鳩氏司徒也鵲鳩氏司民者也九扈為九農正扈民無淫者也自顓頊以來不能紀遠乃紀於近為民師而命以民事則不能故也仲尼聞之見於郊子而學之既而告人曰吾聞之天子失官學在四夷猶信家氏曰周魯俱衰典章闕壞而遠方小國之君乃知前古官名之沿革蓋錄之也汪氏曰世亂禮廢而博學多識之士猶有存者有王者作皆可用為政故仲尼嘆中國寡陋不若郊之猶有人也

八月晉荀吳帥師滅陸渾之戎

左傳晉侯使屠蒯如周請有事於雒與三塗萇弘謂劉子曰客容猛非祭也具伐戎乎陸渾氏甚睦於楚必是故也君其備之乃警戎備九月丁卯晉荀吳帥師涉自棘津使祭史先用牲于雒陸渾人弗知師從之庚午遂滅陸渾數之以其貳於楚也陸渾子奔楚其衆奔甘鹿周大獲宣子夢文公攜荀吳而授之陸渾故使穆子帥師獻俘于文官

林父之於潞氏士會之於甲氏荀吳之於陸渾戎皆滅之也而林父士會稱師稱人荀吳舉其名氏何哉  
内外有辨陸渾之戎密邇王室而縱之逼處則非肅

畿輔別內外之義也與闢土服遠以圖強霸則異矣然舉其名氏非褒詞也纔得無貶耳則窮兵於遠虛

內事外者可知矣

高氏曰宣三年楚子伐陸渾之戎自是陸渾睦於楚而為中國之害

至是荀吳滅之汪氏曰戎居諸夏之區固周室之大害也晉武不能徙戎卒至於神州陸沉則中行穆子之滅陸渾疑可褒矣然陸渾之戎本居秦晉之西北在荒服之外自僖之二十二年晉乃與秦遷之於伊川侵逼王畿則是晉人始謀不臧之過也今也與楚爭強掩其不備而滅之蓋不足以贖前過矣奚可褒之有哉陳氏曰自是凡滅稱大夫矣減不書大夫者吳也吳無大夫也

冬有星孛于大辰

左傳有星孛于大辰西及漢申須曰彗所以除舊布新也天事恒象今除於火火出必布焉諸侯其有大災乎梓慎曰往年吾見之是其徵也火出而見今茲火出而章必火入而伏其居火也久矣其與不然乎火出於夏為三月於商為四月於周為五月夏數得天若火作其四國當之在宋衛陳鄭乎宋大辰之虛也陳大皞之虛也鄭祝融之虛也皆火房也星字及漢漢水祥也衛顓頊之虛也故為帝丘其星為大水水火之牡也其以丙子若壬午作乎水火所以合也若火入而伏必以壬午不過其見之月鄭裨竈言於子產曰宋衛陳鄭將同曰火若我用瓊珥玉璫鄭必不火子產弗與公羊傳孛者何彗星也其言于大辰何在大辰也大辰者何大火也大辰為大辰伐為大辰北辰亦為大辰何以書記異也穀梁傳一有一亡曰有于大辰者濫于大辰也

大辰心也

爾雅大火謂之大辰孔氏曰大火蒼龍宿心以候四時故曰辰心為明堂

天子之象其前星太子後星庶子

春秋元命苞心三星五度有天子明

堂布政之宮前漢書五行志心天子之象也天文志心三星天王正位也中心曰明堂天子位為大辰前

星為太子後

星字星加心象天子適庶將分爭也

何氏曰心

星為庶子

者天子明堂字彗者邪亂之氣掃故置新之象是後周分為二天下兩主

後五年景王崩

王室亂劉子單子立王猛尹氏召伯立子朝歷數載

而後定

事見左傳二十二年二十六年三十二年

至哀十三年有星孛于

東方不言宿名者不加宿也當是時吳人僭亂憑陵

上國日敝於兵暴骨如莽其戾氣所感固將壅吳而

降之罰也故氛祲所指在於東方假手越人吳國遂

滅天之示人顯矣史之有占明矣

宋氏曰大辰大火周木德火將出木

將焚掃舊布新之象天人之際此其見乎襄陵許氏曰星孛大辰火災應之天地之符也大辰明堂當宋之分故王室亂宋亦亂衛陳鄭災氣所溢也衛亂君奔陳敗卿獲唯鄭有令政而無後災是知禍福之可轉也

### 楚人及吳戰于長岸

左傳吳伐楚陽句為令尹卜戰不吉司馬子魚曰我得上流何故不吉且楚故司馬令龜我請改卜令曰鮒也以其屬死之楚師繼之尚大克之吉戰于長岸子魚先死楚師繼之大敗吳師獲其乘舟餘皇使隨人與後至

者守之環而塹之及泉盈其隧炭陳以待命吳公子光請於其衆曰喪先王之乘舟豈唯光之罪衆亦有焉請藉取之以救死衆許之使長鬣者三人潛伏於舟側曰我呼餘皇則對師夜從之三呼皆迭對楚人從而殺之楚師亂吳人大敗之取餘皇以歸公羊傳詐戰不言戰此其言戰何敵也殺梁傳楚人及吳戰于長岸進楚于戰故曰

言戰不言敗勝負敵也

汪氏曰楚先勝吳吳後復勝楚

楚地五千里

帶甲數十萬戰勝諸侯威服天下本非吳敵也惟不

能去讒賤貨使費無極以讒勝囊瓦以貨行而策士

奇才為敵國用

汪氏曰如屈巫伍員之類

故日以侵削至雞父之



師七國皆敗柏舉之戰國破君奔幾於亡滅吳日益  
強而楚削矣是故為國必以得賢為本勸賢必以去  
讒賤貨為先不然雖廣土衆民不足恃也考其所書

本末強弱之由其為後世戒明矣

陳氏曰此楚令尹陽句也書人吳公

子光也書國畧之也楚之君大夫不見於春秋者十八年而吳入郢矣五年吳嘗敗楚于鵲岸不書六年敗楚于房鍾不書書伐吳而已於是始書戰則以吳楚敵言之也○劉氏曰穀梁云進楚子故曰戰非也戰則云戰敗則云敗豈擇於吳楚哉且楚與中國並久矣豈至此而進之哉

丁景王二十一年

十有八年

晉頃二齊景二十四衛靈十一蔡平六鄭定六曹平四卒陳惠六杞

平十二宋元八秦哀  
十三楚平五吳僚三

春

附錄

左傳春王三月乙卯周毛得殺毛伯過而代之以  
莒弘曰毛得必亡是昆吾稔之日也侈故之以

而毛得以濟侈於  
王都不亡何待

王三月曹伯須卒

左傳曹

平公卒

夏五月壬午宋衛陳鄭災

左傳五月火始昏見丙子風梓慎曰是謂融風火之始  
也七日具火作乎戊寅風甚至午大甚宋衛陳鄭皆火

梓慎登大庭氏之庫以望之曰宋衛陳鄭也數日皆來告火裨竈曰不用吾言鄭又將火鄭人請用之子產不可子大叔曰竇以保民也若有火國幾亡可以救亡子何愛焉子產曰天道遠人道邇非所及也何以知之竈焉知天道是亦多言矣豈不或信遂不與亦不復火鄭之未災也里析告子產曰將有大祥民震動國幾亡吾身泯焉弗良及也國遷其可乎子產曰雖可吾不足以定遷矣及火里析死矣未葬子產使輿三十人遷其柩火作子產辭晉公子公孫于東門使司寇出新客禁舊客勿出於官使子寬子上巡羣屏攝至于太宮使公孫登徙大龜使祝史徙主祀於周廟告于先君使府人庫人各儆其事商成公儆司宮出舊宮入真諸火所不及司馬司寇列居火道行火所燉城下之人伍列登城明日使野司寇各保其徵郊人助祝史除於國北禳火于玄冥回祿祁于四廊書焚室而寬其征與之材三日哭國不市使行人告於諸侯宋衛皆如是陳不救火許不

吊災君子是以知陳許之先亡也公羊傳何以書記異也何異耳異其同日而俱災也外異不書此何以書為天下記異也穀梁傳其志以同日也其日亦以同日也或曰人有謂鄭子產曰某日有災子產曰天者神子惡知之是人也同日為四國災也

按左氏鄭災子產臨事而備至于書焚室而寬其征

杜氏曰記所焚之戶數而寬其賦稅

與之材三日哭國不市使行人告

於諸侯宋衛皆如是陳不救火許不吊災君子以是

知陳許之先亡也初裨竈言于子產宋衛陳將同

日火若我用瓘斚玉瓚

杜氏曰瓘珪也斚玉爵也瓚勺也欲以禳火

鄭必

不火子產弗與及鄭既災竈曰不用吾言鄭又將火  
鄭人請用之子產不可曰天道遠人道邇非所及也  
何以知之亦不復火裨竈所言蓋以象推非妄也而  
鄭不復火者子產當國方有令政此以德消變之驗  
矣是知吉凶禍福固有可移之理古人所以必先人  
事後言命也

劉氏曰四國同日而災非人所能為也  
其序宋衛陳鄭春秋之正也同德則尚

爵同爵  
則尚親

六月邾人入郕

左傳邾人藉稻邾人襲邾邾人將閉門邾人羊羅攝其首焉遂入之盡俘以歸邾子曰余無歸矣從帑于邾邾莊公反邾夫人而舍其女杜氏曰邾姒姓國在瑯琊開陽縣汪氏曰書以惡邾且為宋公伐邾起也

### 秋葬曹平公

左傳葬曹平公往者見周原伯魯焉與之語不說學歸以語閔子馬閔子馬曰周其亂乎夫必多有是說而後及其大人大人患失而惑又曰可以無學無學不害不害而不學則苟而可於是乎下陵上替能無亂乎夫學殖也不學將落原氏其亡乎

### 附錄

左傳七月鄭子產為火故大為社被禳於四方振除火災禮也乃簡兵大蒐將為蒐除子太叔

之廟在道南其寢在道北其庭小過期三日使除徒陳於道南廟北曰子產過女而命速除乃毀於而鄉

子產朝過而怒之除者南毀子產及衝使從者止之  
曰毀於北方火之作也子產授兵登陴子太叔曰晉  
無乃討乎子產曰吾聞之小國忘守則危況有災乎  
國之不可小有備故也既晉之邊吏讓鄭曰鄭國有  
災晉君大夫不敢寧居卜筮走望不愛牲玉鄭之有  
災寡君之憂也今執事憫然授兵登陴將以誰罪邊  
人恐懼不敢不告子產對曰若吾子之言敝邑之災  
君之憂也敝邑失政天降之災又懼讒慝之間謀之  
以啓貪人薦為敝邑不利以重君之憂幸而不亡猶  
可說也不幸而亡君雖憂之亦無及也鄭有他竟望  
走在晉既事晉  
矣其敢有二心

## 冬許遷于白羽

左傳楚左尹王子勝言於楚子曰許於鄭仇敵也而居  
楚地以不禮於鄭晉鄭方睦鄭若伐許而晉助之楚喪

地矣君盍遷許許不專於楚鄭方有令政許曰余舊國也鄭曰余俘邑也葉在楚國方城外之蔽也土不可易國不可小許不可俘讐不可啟君其圖之楚子說冬楚子使王子勝遷許於析實白羽張氏曰白羽一名析楚邑杜氏曰自葉遷也畏鄭而樂遷故以自遷為文茅堂胡氏曰本所以存許非強之也汪氏曰復封陳蔡而許亦遷葉故今自葉而遷許至是三遷矣

戊景王二十有九年晉頃三齊景二十五衛靈十二蔡寅十二年平七鄭定七曹悼公午元年陳惠七杞平十三宋元九秦哀十四楚平六吳僚四

春

附錄

左傳春楚工尹赤遷陰于下陰令尹子瑕城郟叔孫昭子曰楚不在諸侯矣其僅自完也以持



其世而已。○楚子之在蔡也，鄆陽封人之女奔之。生太子建，及即位，使伍奢為之師，費無極為少師，無寵焉。欲譖諸王，曰：「建可室矣。」王為之聘於秦，無極與逆，勸王取之。正月，楚夫人羸氏至自秦。

## 宋公伐邾

左傳：邾夫人宋向戌之女也，故向寧請師。二月，宋公伐邾，圍蟲三月，取之，乃盡歸邾俘。邾人邠人、徐人會宋公盟于蟲。乙亥同。

按左氏：宋公伐邾，圍蟲取之，而經不書圍，與取何也？初，邾人藉稻，邾人襲邾，盡俘之。邾子曰：「余無歸矣。」從帑於邾。邾子反其夫人，而舍其女。夫人宋向戌之女。

也故向寧請師圍蟲取之盡歸邠俘此所謂聲罪執言之兵歸邠之俘其善意也故書伐邾而釋其取邑之罪此亦善善長惡惡短之義

高氏曰天下無霸而宋元於此一正入邠

之亂是以春秋錄而進之家氏曰凡書爵而書侵伐者多貶此繼邾人入邠而書宋公伐邾則與宋公之討有罪也王氏曰因其臣之私請而興師伐國當時列國之政大夫專之故也

夏五月戊辰許世子止弑其君買

左傳夏許悼公癸丑五月戊辰飲太子止之藥卒太子奔晉書曰弑其君君子曰盡心力以事君舍藥物可也穀梁傳曰弑正卒也正卒則止不弑也不弑而曰弑責止也止曰我與夫弑者不立乎其位以與其弟廼哭泣歔

飡粥噍不容粒未踰年而死故君子即止自責而責之也汪氏曰悼公在位二十四年世子止之弟斯立是為公元公

按左氏許悼公癘戊辰飲世子止之藥卒書曰弑其

君者止不嘗藥也

禮記文王世子子疾之藥必親嘗之

古者醫不三世

不服其藥夫子之所慎者三疾居其一

朱子曰疾吾身之所以死

生存亡者不可以不謹也

季康子饋藥曰丘未達不敢嘗

揚氏曰謹疾也

敬慎其身如此也而於君父可忽乎君有疾飲藥臣

先嘗之父有疾飲藥子先嘗之蓋言慎也止不擇醫

而輕用其藥藥不先嘗而誤進於君是有忽君父之

心而不慎矣

茅堂胡氏曰悼公不起是飲非其藥而致卒也止不嘗藥是有忽君父之心而

不敬也樂正子下堂傷足而有憂色跬步之間猶不敢忘父母況父母之疾而可輕之乎自小人

之情度之世子弑君欲速得其位而止無此心故曰

我與夫弑者不立乎其位哭泣齧飭粥嗑不容粒

音嗑

益咽喉也

未逾年而卒無此心故被以大惡而不受自君

子聽之止不嘗藥是忽君父之尊而不慎也而止有

此心忽君父之尊而不慎此篡弑之萌堅冰之漸而

春秋之所謹也有此心故加以大惡而不得辭書許世子止弑君乃除惡於微之意也而或者顧以操刃而殺與不躬進藥及進藥而不嘗三者罪當殊科疑於三傳之說則誤矣

汪氏曰歐陽公辨三傳論止為真弑

必若此言夫

人而能為春秋奚待於聖筆乎墨翟兼愛豈其無父楊朱為我豈其無君孟軻氏辭而闢之以為禽獸逼人將相食後世推明其功不在禹下未有譏其過者知此說則知止不嘗藥春秋以為弑君之意矣

陸氏

曰世子君之貳也許其進藥則亂臣賊子得容其姦矣故聖人罪止一人以絕萬世之禍也張氏曰藥劑所以致人之死者非一端姑以瘡言之今之治瘡以砒燬而餌之多愈然燬不得法而反殺人者多矣悼公之死必此類也然止以弒書何也孟子曰殺人以挺與及有以異乎曰無以異也以與政有以異乎曰無以異也進藥而藥殺可不謂之弒哉其所以異於商臣蔡般者過與故不同耳心雖不同而春秋之文一施之者以臣子之於君父不可過也鄆陽萬氏曰許止之事雖若可恕萬一後世臣子幸君父之疾進藥以斃之而自附於不知嘗藥之義是啓之為亂原也陳氏曰哀姜慶父弒閔公書曰公薨夫人姜氏孫于邾公子慶父出奔莒則罪人斯得矣許悼公飲世子止之藥而卒世子奔晉世子止誠不當藥爾春秋將為後人戒書曰世子止弒其君不言奔可也劉氏曰穀梁云日弒正卒也非也州吁無知督萬商

臣趙盾歸生夏徵舒崔杼寧喜弑君皆書日可云皆正卒乎春秋褒貶豈不明恃日月而後見之此泥而不通也廬陵李氏曰春秋加趙盾弑君訓人以臣道也加許止弑君訓人以子道也二事相類然晉靈公不書葬而許悼公書葬者許止自責逾年而卒其心可知矣趙盾力能討賊而不討春秋不得不終誅之也若陳氏因左氏止奔晉之說而疑止真弑父則又恐未可以一家一句而盡廢諸傳之文也

## 巳卯地震

汪氏曰經書地震者五昭公之世再見此年及二十三年是也夫地道安靜以震動為反常之異臣道恭順以悖逆為犯上之惡是時季孫強僭已甚天之示變欲人君之有所警而以德銷之也昭公漫不知省過及於難

悲夫

附錄

左傳楚子為舟師以伐濮費無極言於楚子曰晉之伯也過於諸夏而楚辟陋故弗能與爭若

大城城父而寘太子焉以通北方王收南方是得天下也王說從之故大子建居于城父令尹子瑕聘于

秦拜夫

人也

# 秋齊高發帥師伐莒

左傳齊高發帥師伐莒莒子奔紀鄆使孫書伐之初莒有婦人莒子殺其夫已為嫠婦及老託於紀鄆紡焉以度而去之及師至則投諸外或獻諸子占子占使師夜緇而登登者六十人緇絕師鼓譟城上之人亦譟莒共公懼啓西門而出七月丙子齊師入紀高氏曰莒不事齊故汪氏曰齊景爭霸之心不下於僖桓而徒計近功汲汲焉有事於徐莒以晏子之賢為之輔佐而不能有所匡正則所謂以其君顯者何足稱哉亦



冬葬許悼公

公羊傳賊未討何以書葬不成于弑也昌為不成于弑  
止進藥而藥殺也止進藥而藥殺則何為加弑焉耳譏  
子道之不盡也其譏子道之不盡奈何曰樂正子春之  
視疾也復加一飯則脫然愈復損一飯則脫然愈復加  
一衣則脫然愈復損一衣則脫然愈止進藥而藥殺是  
以君子加弑焉爾曰許世子止弑其君買是君子之聽  
止也葬許悼公是君子之赦止也赦止者免止之罪辭  
也穀梁傳曰卒時葬不使止為弑父也曰子既生不免  
乎水火母之罪也羈貫成童不就師傳父之罪也就師  
學問無方心志不通身之罪也心志既通而名譽不聞  
友之罪也名譽既聞有司不舉有司之罪也有司舉之  
王者不用王者之過也許世子不知嘗藥累及許君也  
程子曰蔡般許  
止疑同故書葬

何以書葬穀梁子曰不使止為弑父也其說曰子既

生不免乎水火母之罪也羈貫成童

范氏曰羈貫謂交午剪髮以為

飾成童八歲以上

不就師傅父之罪也就師學問無方心志

不通身之罪也心志既通而名譽不聞友之罪也名

譽既聞有司不舉有司之罪也有司舉之王者不用

王者之過也許世子止不知嘗藥累及許君也

范氏曰許

君不授子以師傅使不識嘗藥之義故累及之

觀止自責可謂有過人之質矣

乃至以弑君獲罪此為人臣子而不知春秋之義者

也古者太子自其初生固舉以禮有司端冕見之南郊過闕則下過廟則趨為赤子而其教已有齊肅敬慎之端矣此春秋訓臣子除惡於微積善於早之意

也

家氏曰或問蔡般之弑景許止之弑悼皆書葬同乎否乎曰其弑異其葬惡得而同

附錄

左傳是歲也鄭駟偃卒子游娶於晉大夫生絲弱其父兄立子瑕子產憎其為人且以為不

順弗許亦弗止駟氏聳他日絲以告其舅冬晉人使以幣如鄭問駟乞之立故駟氏懼駟乞欲逃子產弗遣請龜以下亦弗予大夫謀對子產不待而對客曰鄭國不天寡君之二三臣札瘥天昏今又喪我先大夫偃其子幼弱其一二父兄懼隊宗主私族於謀而立長親寡君與其二三老曰抑天實剥亂是吾何知

焉諺曰無過亂門民有兵亂猶憚過之而況敢知天之所亂今大夫將問其故抑寡君實不敢知其誰實知之乎丘之會君尋舊盟曰無或失職若寡君之二三臣其即世者晉大夫而專制其位是晉之縣鄙也何國之為辭客幣而報其使晉人舍之○楚人城州來沈尹戌曰楚人必敗昔吳滅州來子旗請伐之王曰吾未撫吾民今亦如之而城州來以挑吳能無敗乎侍者曰王施舍不倦息民五年可謂撫之矣戌曰吾聞撫民者節用於內而樹德於外民樂其性而無寇讎今宮室無量民人日駭勞罷死轉忘寢與食非撫之也○鄭大水龍闕于時門之外洧淵國人請為禱焉子產弗許曰我闕龍不我覲也龍闕我獨何覲焉禳之則彼其室也吾無求於龍龍亦無求於我乃止也○令尹子瑕言蹇由於楚子曰彼何罪諺所謂室於怨市於色者楚之謂矣舍前之怨可也乃歸蹇由

已景王二十二年  
晉頃四齊景二十六衛靈十三蔡平  
卯十三年  
八卒鄭定八曹悼二陳惠八杞平十

四宋元十秦哀十  
五楚平七吳僚五

# 春王正月

## 附錄

左傳春王二月己丑日南至梓慎望氛曰今茲  
宋有亂國幾亡三年而後弭蔡有大喪叔孫昭

子曰然則戴桓也汰侈無禮已甚亂所在也○費無  
極言於楚子曰建與伍奢將以方城之外叛自以為  
猶宋鄭也齊晉又交輔之將以害楚其事集矣王信  
之問伍奢伍奢對曰君一過多矣何信于讒王執伍  
奢使城父司馬奮揚殺太子未至而使遣之三月太  
子建奔宋王召奮揚奮揚使城父人執已以至王曰言出  
於余口入於爾耳誰告建也對曰臣告之君王命臣  
曰事建如事余臣不佞不能苟貳奉初以還不忍後

命故遣之既而悔之亦無及已王曰而敢來何也對曰使而失命召而不來是再奸也逃無所入王曰歸從政如他日無極曰奢之子材若在吳必憂楚國盍以免其父召之彼仁必來不然將為患王使召之曰來吾免而父棠君尚謂其弟員曰爾適吳我將歸死吾知不逮我將死爾能報聞免父之命不可以莫之奔也親戚為戮不可以莫之報也奔死免父孝也度功而行仁也擇任而往知也知死不辟勇也父不可棄名不可廢爾其勉之相從為愈伍尚歸奢聞員不來曰楚君大夫其盱食乎楚人皆殺之員如吳言伐楚之利於州于吳公子光曰是宗為戮而欲反其讎不可從也員曰彼將有他志余姑為之求士而鄙以待之乃見鱣設諸焉而耕於鄙

夏曹公孫會自鄆出奔宋

公羊傳奔未有言自者此其言自何畔也畔則曷為不言其畔為公子喜時之後諱也春秋為賢者諱何賢乎公子喜時讓國也其讓國奈何曹伯廬卒于師則未知公子喜時從與公子負芻從與或為主于國為主于師公子喜時見公子負芻之當主也逡巡而退賢公子喜時則曷為為會諱君子之善善也長惡惡也短惡惡止其身善善及子孫賢者子孫故君子為之諱也穀梁傳自夢者專乎夢也曹無大夫其曰公孫何也言其以貴取之而不以叛也高氏曰會子臧之子鄭子臧之采邑也

奔未有言自者此其言自何

劉氏曰大夫之奔未有言其自者獨此言自鄭

是變例也

劉敞曰待放也古者大夫有罪待放於其境三

年君賜之環則復之賜玦則去

荀子大畧篇絕人以玦反絕以環注內好

如一謂之還  
缺如環而缺

逾境則為位向國而哭素衣裳冠不說

人以無罪此去國之禮曹無大夫其曰公孫賢之也

范氏曰會以公孫之貴而得薨既而不以之叛明待  
曹君無道致令其奔非會之罪故書公孫以善之

放而後出奔臣子常禮免於貶足矣而何以賢之為

公子喜時之後賢之也喜時者曹之社稷鎮公子能

以國讓不取乎為諸侯所謂子臧是也春秋之義善

善也長惡惡也短善善及子孫惡惡止其身以其賢

者之後苟可善焉斯進之矣此舜典罰弗及嗣賞延



于世之意也後世議者有乞錄用賢者之類功臣之

世

江氏曰如漢武帝封姬嘉成帝封孔吉宣帝求高祖功臣子孫失侯者封蕭何子孫之類

蓋得

春秋之旨矣

孫氏曰鄭公孫會之邑也言自鄭出奔宋以別從國都而去也○劉氏曰公羊

云不言其畔為公子喜時之後諱也非也所以諱賢者之過也謂小不足以妨大短不足以毀長而可以成人之美者也若乃大惡至叛君專地反臣子之義亂人倫之常矣而猶為之諱乎汪氏曰春秋書大夫自其叛邑出奔者皆先書叛故宋華亥向寧華定自南里出奔楚先書入南里以叛宋公弟辰自蕭來奔先書入蕭以叛此書自鄭出奔而先不書叛則非叛也蓋鄭乃公孫會繼其父之食邑而得專制之者如穀梁之說爾得罪待放君無赦命是以自其所食之邑而奔他國也廬陵李氏曰此條書法與華向自宋

南里出奔楚同左氏杜預無傳已不可考賈逵及公羊皆以為叛然經既不書叛且既叛則不應書公孫故公羊有為喜時諱之說夫叛逆而以其祖父故諱之是管蔡不當誅於周也大傷教矣惟劉氏意林曰春秋之時臣能專其邑無不叛其國者能使其衆無不要其君者臧武仲之智猶據防以求後是以孔子譏之以謂其罪與不孝非聖者均也故深察公孫歸父之至極奔齊公孫會之自鄭奔宋其賢於臧武仲遠矣降而無憾憾而能矜惟知命而好禮者能之此說蓋本穀梁而胡氏亦取之然公孫會之書例之公孫子未可矣胡氏亦以為賢者之後諱之似鑿

附錄

左傳宋元公無信多私而惡華向華定華亥與向寧謀曰亡愈於死先諸華亥偽有疾以誘羣

公子公子問之則執之夏六月丙申殺公子寅公子御戎公子未公子固公孫援公孫丁拘向勝向行於

其廩公如華氏請焉弗許遂劫之癸卯取太子樂與  
母弟辰公子地以為質公亦取華亥之子無感向寧  
之子羅華定之子啓  
與華氏盟以為質

### 秋盜殺衛侯之兄縶

左傳衛公孟縶狎齊豹奪之司寇與鄆有役則反之無  
則取之公孟惡北公喜褚師圃欲去之公子朝通于襄  
夫人宣姜懼而欲以作亂故齊豹北宮喜褚師圃公子  
朝作亂初齊豹見宗魯於公孟為驂乘焉將作亂而謂  
之曰公孟之不善子所知也勿與乘吾將殺之對曰吾  
由子事公孟子假吾名焉故不吾遠也雖其不善吾亦  
知之抑以利故不能去是吾過也今聞難而逃是僭子  
也子行事乎吾將死之以周事子而歸死於公孟其可  
也丙辰衛侯在平壽公孟有事於蒞獲之門外齊子氏  
帷於門外而伏甲焉使祝鼂寘戈於車薪以當門使一

乘從公孟以出使華齊御公孟宗魯駢乘及閭中齊氏  
用戈擊公孟宗魯以背蔽之斷肱以中公孟之肩皆殺  
之公聞亂乘驅自閭門入慶比御公公南楚駢乘使華  
寅乘貳車及公宮鴻駢駘駟乘于公公載寶以出褚師  
子申遇公于馬路之衢遂從過齊氏使華寅肉袒執蓋  
以當其闕齊氏射公中南楚之背公遂出寅閉郭門踰  
而從公公如死鳥析朱鉏宵從竇出徒行從公齊侯使  
公孫青聘于衛既出聞衛亂使請所聘公曰猶在境內  
則衛君也乃將事焉遂從諸死鳥請將事辭曰亡人不  
佞失守社稷越在草莽吾子無所辱君命賓曰寡君命  
下臣於朝曰阿下執事臣不敢貳主人曰君若惠顧先  
君之好照臨敝邑鎮撫其社稷則有宗祧在乃止衛侯  
固請見之不獲命以其良馬見為未致使故也衛侯以  
為乘馬賓將擯主人辭曰亡人之憂不可以及吾子草  
莽之中不足以辱從者敢辭賓曰寡君之下臣君之牧  
圉也若不獲扞外役是不有寡君也臣懼不免於戾請

以除死親執鐸終夕與於燎齊氏之宰渠子召北宮子  
北宮氏之宰不與聞謀殺渠子遂伐齊氏滅之丁巳晦  
公入與北宮喜盟于彭水之上秋七月戊午朔遂盟國  
人八月辛亥公子朝褚師圃子玉霄子高魴出奔晉閏  
月戊辰殺宣姜衛侯賜北宮喜謚曰貞子賜析朱鉏謚  
曰成子而以齊氏之墓予之衛侯告寧于齊且言子石  
齊侯將飲酒徧賜大夫曰二三子之教也苑何忌辭曰  
與於青之賞必及於其罰在康誥曰父子兄弟罪不相  
及況在羣臣臣敢貪君賜以干先王琴張聞宗魯死將  
往弔之仲尼曰齊豹之盜而孟縶之賊女何弔焉君子  
不食姦不受亂不為利疚於回不以回待人蓋不義  
不犯非禮公羊傳母兄稱兄何以不立有疾也何疾  
爾惡疾也穀梁傳盜賤也其曰兄母兄也目衛侯衛侯  
累也然則何為不為君也曰有天疾者不得入乎宗廟  
輒者何也曰兩足不能相過齊  
謂之暴楚謂之蹠衛謂之輒

左氏以為齊豹殺之也齊豹為衛司寇守嗣大夫其書為盜所謂求名而不得者也若艱難其身以險危大人而有名章徹攻難之士將奔走之臣竊以為仲尼書斷此獄罪在宗魯宗魯孟縶之驂乘也於法應書曰盜非求名而不得者也天下豈有欲求險危大人之惡名而聖人又斬此名而不與者哉然則齊豹首謀作亂宗魯雖與聞行事又以身死之矣今乃釋豹不誅而歸獄於宗魯不亦頗乎曰豹之不義夫人

皆知之也。若宗魯欲周事豹而死於公孟，蓋未有知其罪者。故琴張聞其死，將往弔之。仲尼曰：「齊豹之盜，孟縶之賊，汝何弔焉？」非聖人發其食姦受亂，蓋不義犯非禮之罪，書於春秋，則齊豹所畜養之盜，孟縶所見殺之賊，其大惡隱矣。

家氏曰：宗魯始因齊豹而事公孟，豹將作亂，語宗魯使之。

先去宗魯不能去，亦不以告其主，既而乃與公孟俱死於齊。豹之難彼，自謂忠於縶，信於豹，而於二者皆失之。知公孟之惡而事之，不能早去，耽祿也。聞齊豹將作亂，不以告其主，不忠也。雖與公孟俱死而死，不足錄。所謂求名而不得者也。文定之說有得於聖人之意。臨川吳氏曰：凡稱盜蓋皆賤者，但當稱人以其

所作不義故不稱人而稱盜范氏曰諸侯之尊弟兄  
不得以屬通經不書衛公子而斥言衛侯之兄者惡  
其不能保護其兄乃為盜所殺故稱至賤殺至貴孫  
氏曰以衛侯之母兄盜得殺之衛侯之無刑政也若  
此故書以著其惡張氏曰繫以有疾不得列於宗而  
廢是以靈公得立則所以事其兄使全其身者必無  
所不用其至親愛之而死不得有為於其國此舜所  
以盡其恩於兄弟也靈公受國於有疾之兄乃聽其  
無禮於大夫且俾之預於政而又不能防閑其母以  
預制其禍亂使盜賊竊發兄死身危幾亡其國故書  
盜殺衛侯之兄繫以深罪之也○劉氏曰左氏云齊  
豹殺之求名而亡非也豹挾怨除憤發泄為亂耳本  
無不畏強禦之名不畏強禦之名亦非豹所求也意  
豹作亂不能不心愧此正欲蓋非求名者有云險危  
大人而有名章徹攻難之士將奔走之設春秋書齊  
豹殺衛侯之兄繫其貶甚於稱盜矣人亦未肯奔走



其民也廬陵李氏曰左氏說見昭三十一年胡氏不取然春秋書盜者四尉止也齊豹也公孫翩也陽虎也皆大夫也故任公輔以為豹非卿故曰盜而陳氏亦曰既奪之司寇則非卿矣恐其說亦是其罪衛侯之說公穀得之諸家皆同

### 冬十月宋華亥向寧華定出奔陳

左傳宋華向之亂公子城公孫忌樂舍司馬彊向宜向鄭楚建鄆申出奔鄭其徒與華氏戰于鬼闔敗子城子城適晉華亥與其妻必盟而食所質公子者而後食公與夫人每日必適華氏食公子而後歸華亥患之欲歸公子向寧曰唯不信故質其子若又歸之死無日矣公請於華費遂將攻華氏對曰臣不敢愛死無乃求去憂而滋長乎臣是以懼敢不聽命公曰子死亡有命余不忍其詢冬十月公殺華向之質而攻之戊辰華向奔陳

華登奔吳向寧欲殺太子華亥曰干君而出又殺其子其誰納我且歸之有庸使少司寇掣以歸曰子之齒長矣不能事人以三公子為質必免公子既入華掣將自門行公遽見之執其手曰余知而無罪也入復而所家氏曰春秋書三卿同日而奔不唯誅華向其君亦有責焉爾陳氏曰公子城公孫忌八子奔鄭華亥向寧華定奔陳其但書三子何凡奔罪也衆不可勝罪則罪其甚者入南里以叛乞師于楚為宋患之日久是以甚三子也

十有一月辛卯蔡侯廬卒

附錄

左傳齊侯疥遂疢期而不瘳諸侯之賓問疾者多在梁丘據與裔款言於公曰吾事鬼神豐於

先君有加矣今君疾病為諸侯憂是祝史之罪也諸侯不知其謂我不敬君盍誅於祝固史嚚以辭賓公

說告晏子晏子曰日宋之盟屈建問范會之德於趙武趙武曰夫子之家事治言於晉國竭情無私其祝史祭祀陳信不愧其家事無猜其祝史不祈建以語康王康王曰神人無怨宜夫子之光輔五君以為諸侯主也公曰據與歟謂寡人能事鬼神故欲誅於祝史子稱是語何故對曰若有德之君外內不廢上下無怨動無違事其祝史薦信無愧心矣是以鬼神用饗國受其福祝史與焉其所以蕃祉老壽者為信君使也其言忠信於鬼神其適遇淫君外內頗邪上下怨疾動作辟違從欲厭私高臺深池撞鐘舞女斬刈民力輸掠其聚以成其違不恤後人暴虐淫從肆行非度無所還忌不思謗讟不憚鬼神神怒民痛無悛于心其祝史薦信是言罪也其蓋失數美是矯誣也進退無辭則虛以求媚是以鬼神不饗其國以禍之祝史與焉所以天昏孤疾者為暴君使也其言僭慢於鬼神公曰然則若之何對曰不可為也山林之木

衡鹿守之澤之萑蒲舟鉞守之藪之薪蒸虞侯守之海之鹽蜃祈望守之縣鄙之人入從其政偏介之闕暴征其私承嗣大夫強易其賄布常無藝徵歛無度宮室日更淫樂不違內寵之妾肆奪於市外寵之臣僭令於鄙私欲養求不給則應民人苦病夫婦皆詛祝有益也詛亦有損耶攝以東姑尤以西其為人也多矣雖其善祝豈能勝億兆人之詛君若欲誅於祝史修德而後可公說使有司寬政毀闕去禁薄歛已責○十二月齊侯田于沛招虞人以弓不進公使執之辭曰昔我先君之田也旃以招大夫弓以招士皮冠以招虞人臣不見皮冠故不敢進乃舍之仲尼曰守道不如守官君子韙之○齊侯至自田晏子侍於遯臺子猶馳而造焉公曰唯據與我和夫晏子對曰據亦同也焉得為和公曰和與同異乎對曰異和如羹焉水火醯醢鹽梅以烹魚肉燂之以薪宰夫和之齊之以味濟其不及以洩其過君子食之以平其心

君臣亦然君所謂可而有否焉臣獻其否以成其可  
君所謂否而有可焉臣獻其可以去其否是以政平  
而不干民無爭心故詩曰亦有和羹既戒既平酸醎  
無言時靡有爭先王之濟五味和五聲也以平其心  
成其政也聲亦如味一氣二體三類四物五聲六律  
七音八風九歌以相成也清濁大小短長疾徐哀樂  
剛柔遲速高下出入周疏以相濟也君子聽之以平  
其心心平德和故詩曰德音不瑕今據不然君所謂  
可據亦曰可君所謂否據亦曰否若以水濟水誰能  
食之若琴瑟之專壹誰能聽之同之不可也如是飲  
酒樂公曰古而無死其樂若何晏子對曰古而無死  
則古之樂也君何得焉昔爽鳩氏始居此地季荊因  
之有逢伯陵因之蒲姑氏因之而後大公因之古者  
無死爽鳩氏之樂非君所願也○鄭子產有疾謂子  
太叔曰我死子必為政唯有德者能以寬服民其次  
莫如猛夫火烈民望而畏之故鮮死焉水懦弱民狎

而翫之則多死焉故寬難疾數月而卒太叔為政不忍猛而寬鄭國多盜取人於荏苒之澤太叔悔之曰吾早從夫子不及此興徒兵以攻荏苒之盜盡殺之盜少止仲尼曰善哉政寬則民慢慢則糾之以猛猛則民殘殘則施之以寬寬以濟猛猛以濟寬政是以和詩曰民亦勞止迄可小康惠此中國以綏四方施之以寬也毋從詭隨以謹無良武遏寇虐慘不畏明糾之以猛也柔遠能邇以定我王平之以和也又曰不競不綏不剛不柔布政優優百禄是適和之至也及子產卒仲尼聞之出涕曰古之遺愛也

庚景王二十

二十有一年

晉頃五齊景二十七年鄭定九曹悼

三陳惠九杞平十五宋元十

一秦哀十六楚平八吳僚六

春

附錄

左傳春天王將鑄無射泠州鳩曰王其以心疾死乎夫樂天子之職也夫音樂之興也而鐘音

之器也天子省風以作樂器以鍾之興以行之小者不窺大者不櫛則和於物物和則嘉成故和聲入於耳而藏於心心億則樂窅則不咸櫛則不容心是以感感實生疾今鐘櫛矣王心弗堪其能久乎

王三月葬蔡平公

左傳三月葬蔡平公蔡太子朱失位位在卑大夫送葬者歸見昭子昭子問蔡故以告昭子歎曰蔡其亡乎若不亡是君也必不終詩曰不解于位民之攸墜今蔡侯始即位而適卑身將從之

夏晉侯使士鞅來聘

書聘止此左傳夏晉士鞅來聘叔孫為政季孫欲惡諸晉使有司以齊鮑國歸費之禮為士鞅士鞅怒曰鮑國

之位下其國小而使鞅從其牢禮是卑蔽邑也將復諸寡君魯人恐加四牢焉為十一牢杜氏曰晉頃公即位通嗣君襄陵許氏曰禮好不結而財求無度則聘義亡矣蓋自是聘不復志汪氏曰二十三年晉執舍蓋原於士鞅之怒也晉之聘魯者十有一始於荀庚而終於士鞅始則仇而要盟終則怒而責禮霸者之臣所以修聘於望國之魯其非邦交之舊亦甚矣

宋華亥向寧華定自陳入于宋南里以叛

左傳宋華費遂生華貜華多僚華登貜為少司馬多僚為御士與貜相惡乃譖諸公曰貜將納亡人亟言之公曰司馬以吾故亡其良子死亡有命吾不可以再亡之對曰君若愛司馬則如亡死如可逃何遠之有公懼使侍人召司馬之侍人宜僚飲之酒而使告司馬司馬歎曰必多僚也吾有讒子而弗能殺吾又不死抑君有命



可若何乃與公謀逐華繼將使田孟諸而遣之公飲之  
酒厚酬之賜及從者司馬亦如之張句尤之曰必有故  
使子皮承宜僚以劍而訊之宜僚盡以告張句欲殺多  
僚子皮曰司馬老矣登之謂甚吾又重之不如亡也五  
月丙申子皮將見司馬而行則過多僚御司馬而朝張  
句不勝其怒遂與子皮曰任鄭翩殺多僚劫司馬以叛  
而召亡人壬寅華向入樂大心豐愆華輕禦諸橫華氏  
居廬門以南里叛六月庚午宋城舊廡及桑林之門而  
守之公羊傳宋南里者何若曰因諸者然穀梁傳自陳  
陳有奉焉爾入者內弗受也其曰宋南里宋之南鄙也  
以者不以者  
也叛直叛也

按左氏初宋元公無信多私而惡華向三大夫謀曰  
亡愈於死先諸乃誘羣公子殺之公如華氏請焉弗

許遂劫公取太子及其母弟以為質公怒攻之華向

奔陳至是入于南里以叛凡書叛有入于戚者而不

言衛

見襄公二十六年

有入于朝歌者而不言晉

見定公十三年

有

入于蕭者而不言宋

見定公十一年

此獨言宋南里何也戚

與朝歌及蕭見其所食私邑也若南里則宋國城內

之里名也傳稱華氏居廬門南里以叛而宋城舊鄘

及桑林門以守是華氏與宋分國而居矣故其入其

出皆以南里繫之宋此深罪叛臣逼脅其君已甚之

詞也

孫氏曰前年出奔當絕復見者以入宋南里叛犯君當誅○劉氏曰公羊云南里者何若曰因

諸者然非也入宋而居南里也汪氏曰穀梁云南里宋之南鄙非也凡書叛不言四鄙必書其邑此不言邑而繫之宋則為宋城內之里名無疑矣又曰叛直叛也謂直叛而不作亂夫外挾吳楚之援將以覆其宗國其君幾不能自保猶曰不作亂耶其書自陳陳亦有罪矣以奔亡之臣而能入國以為亂非陳助之兵力則未見其可也晉荀吳會齊衛曹之師以救宋而不書圍宋南里者悼公圍彭城則以五大夫歸荀吳救宋而逸賊使華向得遁不臣之誅故不以討叛予之也

秋七月壬午朔日有食之

左傳公問於梓慎曰是何物也禍福何為對曰二至二分日有食之不為災日月之行也分同道也至相過也

其他月則為災陽不克也故常為水汪氏曰日食三十  
六昭公之世凡七見比之他公災異最數自即位至是  
年四書日有食之矣梓慎不能因公之問告以遇災而  
懼之意乃云不為災使公怠於修政遂致失國蓋黨於  
季氏而姑為諂  
諛以說君也

# 八月乙亥叔輒卒

附錄

左傳冬十月華登以吳師救華氏齊烏枝鳴戌  
宋廚人濮曰軍志有之先人有奪人之心後人

有待其衰盍及其勞且未定也伐諸若入而固則華  
氏衆矣悔無及也從之丙寅齊師宋師敗吳師于鴻  
口獲其二帥公子苦錐偃州員華登帥其餘以敗宋  
師公欲出厨人濮曰吾小人可藉死而不能送亡君  
請待之乃徇曰楊徽者公徒也衆從之公自楊門見  
之下而巡之曰國亡君死二三子之恥也豈專孤之

罪也齊烏枝鳴曰用少莫如齊致死齊致死莫如去  
備彼多兵矣請皆用劍從之華氏北復即之厨人濮  
以裳裹首而荷以走曰得華登矣遂敗華氏于新里  
翟偃新居于新里既戰說甲于公而歸華姪居于公  
里亦如之十一月癸未公子城以晉師至曹翰胡會  
晉荀吳齊苑何忌衛公子朝救宋丙戌與華氏戰于  
赭丘鄭翩願為鸞其御願為鵠子祿御公子城莊董  
為右干犢御呂封人華豹張匄為右相遇城還華豹  
曰城也城怒而反之將注豹則闕矣曰平公之靈尚  
輔相余豹射出其間將注則又闕矣曰不狎鄙抽矢  
城射之殪張匄抽矢而下射之折股扶伏而擊之折  
軫又射之死干犢請一矢城曰余言女於君對曰不  
死五乘君之大刑也干刑而從子君焉用之子速諸  
乃射之殪大敗華氏圍諸南里華亥搏膺而呼見華  
貍曰吾為欒氏矣貍曰子無我廷不幸而後亡使華  
登如楚乞師華貍以車十五乘徒七十人犯師而出

食於雖上哭而送之乃復入楚遂起帥師將逆華氏  
大宰犯諫曰諸侯唯宋事其君今又爭國釋君而臣  
是助無乃不可乎王曰  
而告我也後既許之矣

### 冬蔡侯朱出奔楚

左傳費無極取貨於東國而謂蔡人曰朱不用命於楚  
君王將立東國若不先從王欲楚必圍蔡蔡人懼出朱  
而立東國朱愬於楚楚子將討蔡無極曰平侯與楚有  
盟故封其子有二心故廢之靈王殺隱太子其子與君  
同惡德君必甚又使立之不亦可乎且廢置在君蔡無  
他矣穀梁傳東者東國也何為謂之東也王父誘而殺  
焉父執而用焉奔而又奔之曰東惡之而貶之也劉  
氏曰穀梁云東者東國也曰東惡而貶之非也如貶之  
書東國不亦足乎即貶其半名為法者使蔡侯止名東  
當復貶去其上下而云蔡侯出乎汪氏曰或疑此書朱

出奔楚後書東國卒于楚朱無歸入葬之文東國無出奔之事疑只是一事東即東國而誤為朱也然左傳昭二十七年記沈尹戌之言亦曰出蔡侯朱而史記蔡世家亦曰隱太子東國攻平侯子而代立則朱東國固兩人也豈穀梁經文因後書東國而誤也歟

### 公如晉至河乃復

左傳公如晉及河鼓叛晉晉將伐鮮虞故辭公襄陵許氏曰公失其重久矣故晉得輕進退之汪氏曰晉之伐鮮虞豈妨於邦交之禮如文三年晉將伐楚以救江而公如晉成三年晉將伐麇咎如而公亦如晉未聞辭公也況是年晉實未嘗有事于鮮虞蓋托辭以拒公耳高氏曰魯衰而朝於齊晉晉愈強則其往也愈數及魯之益衰也則往而辭焉春秋蓋傷魯之削也滋甚而不能以義自強耳

春秋大全卷三十一



欽定四庫全書

春秋大全卷三十二

明 胡廣等 撰

昭公

辛景王二十  
已五年崩

二十有二年

晉頃六齊景二十八衛靈十  
五蔡悼二鄭定十曹悼四陳

惠十杞平十六宋元十二  
秦哀十七楚平九吳僚七

春齊侯伐莒

左傳春王二月甲子齊北郭啓帥師伐莒莒子將戰苑  
羊牧之諫曰齊師賤其求不多不如下之大國不可怒

也弗聽敗齊師于壽餘齊侯伐莒莒子行成司馬竈如莒泚盟莒子如齊泚盟盟于稷門之外莒於是乎大惡其君高氏曰齊景矜而自功如此安能及遠哉

### 宋華亥向寧華定自宋南里出奔楚

左傳楚薳越使告于宋曰寡君聞君有不令之臣為君憂無寧以為宗羞寡君請受而戮之對曰孤不佞不能媚於父兄以為君憂拜命之辱抑君臣日戰君曰余必臣是助亦惟命人有言曰唯亂門之無過君若惠保敝邑無亢不衷以獎亂人孤之望也唯君圖之楚人患之諸侯之戍謀曰若華氏知困而致死楚恥無功而疾戰非吾利也不如出之以為楚功其亦無能為也已救宋而除其害又何求乃固請出之宋人從之己巳宋華亥向寧華定華貍華登皇奄傷省臧士平出奔楚宋公使公孫忌為大司馬邊卬為大司徒樂祁為司城仲幾為

左師樂大心為右師樂輓為大司寇  
以靖國人穀梁傳自宋南里者專也

華向誘殺羣公子又劫其君取其太子母弟為質又  
求助於吳楚蠻夷入披其國都以叛此必誅不赦之  
賊也宋宜竭力必討之於內諸侯宜協心必救之於  
外楚子宜執叛臣之使而戮之於境今楚人釋君而  
臣是助諸侯之戍怠於救患固請逸賊而宋又從之  
則皆罪也故晉荀吳齊苑何忌衛公子朝曹大夫皆  
畧而不書其曰自宋南里者譏宋之縱釋有罪不能

致討出奔楚者不待貶絕而亢不衷獎亂人之惡自

見矣

陳氏曰齊慶封衛公孟彊再奔皆不書必嘗入叛也而後書晉欒盈鄭良霄猶及殺之矣書奔

譏佚賊也書奔猶可也書歸若晉趙鞅甚矣家氏曰晉楚交兵百有餘年宋人為之弭兵使楚得以竊霸權號召天下今宋大夫為亂於內楚乃從而羽翼之利人之難而欲伐取其國謂楚非夷不可也先書叛繼書奔楚罪楚之納叛臣也

## 大蒐于昌間

穀梁傳秋而曰蒐此春也其曰蒐何也以蒐事也啖氏曰昌間魯地

昭公之時凡三書蒐或以非其時

汪氏曰八年秋蒐于紅十二年夏大

蒐于或以非其地

汪氏曰紅比蒲昌間皆非蒐田之常所

而大意在權

臣專行公不與也

劉氏曰何以書譏何譏爾公不與非禮也蓋不得與爾

三綱

軍政之本

茅堂胡氏曰三綱軍政之本春秋寓軍政於三綱以辨上下定民志孔子曰我戰則

克於春秋見之矣兵家上策先自治凡居於天地之間者有夫婦然後有父子有父子然後有君臣有君臣然後上下有上下然後禮義有所措此戡亂除殘百戰百勝之幾也

古者春蒐夏苗

秋獮冬狩皆於農隙以講事而所主者明貴賤辨等

列順少長習威儀則皆納民於軌物而非馳射擊刺

之末矣

禮記仲尼燕居田獵有禮故戎事閑也

是故觀于有莘少長有

禮知可用也而文公遂霸

見左傳僖公二十八年

臨于洛陽

臨力

鳩反衆

哭日臨袒而伐喪為義帝也而漢祖遂王

見前漢書高祖二年

本紀

今魯國其君則設兩觀乘大輅其臣則八佾舞於

庭旅泰山以雍徹其宰則據大都

汪氏曰南蒯侯犯公山不狃

執

國命

汪氏曰陽虎

而軍政之本亡矣何以蒐為此春秋所

書為後戒之意也

襄陵許氏曰八年秋蒐十一年夏蒐以為書不時也今此春蒐時矣

而書則凡昭公書蒐主刺大夫盛強公失其政兵戎是講而禮防不興也文王之時人倫既正而後軍旅以律朝廷既治而後田野即功是以詩歌庶類蕃殖而蒐田以時當魯昭之季朝廷人倫逆亂極矣而惟

鬼田之是務是以屢書以刺之

# 夏四月乙丑天王崩

左傳王子朝賓起有寵於景王王與賓孟說之欲立之  
劉獻公之庶子伯蚩事單穆公惡賓孟之為人也願殺  
之又惡王子朝之言以為亂願去之賓孟適郊見雄雞  
自斷其尾問之侍者曰自憚其犧也遽歸告王且曰雞  
其憚為人用乎人異於是犧者實用人人犧實難已犧  
何害王弗應夏四月王田北山使公卿皆從將殺單子  
劉子王有心疾乙丑崩於榮錡氏戊辰劉子摯卒無子  
單子立劉蚩五月庚辰見王遂攻賓起殺之盟羣王子  
于單氏

## 附錄

左傳晉之取鼓也既獻而反鼓子焉又叛於鮮  
虞六月荀吳畧東陽使師偽糴者負甲以息於

昔陽之門外遂襲鼓滅之以  
鼓子鳶鞮歸使涉佗守之

# 六月叔鞮如京師葬景王

如京師止此高氏曰天子崩天下諸侯九夷八蠻莫不  
奔其喪故七月而葬者盡天下臣子之心使遠近得會  
其葬也今天王崩諸侯無一奔喪者昭公但使叔鞮  
往會之又以三月而葬是天子而用大夫之禮也

## 王室亂

左傳丁巳葬景王王子朝因舊官百工之喪職秩者與  
靈景之族以作亂帥郊要餞之甲以逐劉子壬戌劉子  
奔揚單子逆悼王于莊宮以歸王子還夜取王以如莊  
宮癸亥單子出王子還與召莊公謀曰不殺單旗不捷  
與之重盟必來背盟而克者多矣從之樊頃子曰非言  
也必不克遂奉王以追單子及領大盟而復殺摯荒以



說劉子如劉單子亡乙丑奔于平時羣王子追之單子殺還姑發弱駸延定稠子朝奔京丙寅伐之京人奔山劉子入于王城辛未鞏簡公敗績于京乙亥甘平公亦敗焉叔鞅至自京師言王室之亂也閔馬父曰子朝必不克其所與者天所廢也公羊傳何言乎王室亂言不及外也穀梁傳亂之為言事未有所成也

何言乎王室亂王者以天下為家則以京師為室京

師者本也周公作立政曰迪惟有夏乃有室大競

蔡氏

曰古之人行此道者惟有夏之君當王室大強之時

其作鵠鵠詩以遺成王亦

曰既取我子無毀我室

朱子曰鵠鵠惡鳥攫鳥子而食室鳥自名其巢也以比武

庚既敗管蔡不可更毀我王室也

皆指京師言之也以京師為室王

畿為堂諸夏為庭戶四夷為藩籬治外者先自內治

遠者先自近本亂而末治者否矣景王寵愛子朝使

孽子配嫡以本亂者其言王室譏國本之不正也本

正而天下定矣

茅堂胡氏曰易曰正家而天下定矣書王室亂譏景王任情溺愛不明庶

嫡之分以譏致爭亂失正家之道也不曰京師亂者京師衆大之稱呂氏曰言京師則通乎上下言王室則其父子兄弟自亂之耳劉氏曰言王室亂亂自內作者也

唐虞公天下則相禪

而與賢三代家天下則相繼而與子

禮記禮運大道之行天下為公

選賢與能不獨親其親子其子大道既隱天下為家各親其親各子其子大人世及以為禮

春秋

兼帝王之道可公也則以達節為權故季札辭國賤而稱名可家也則以居正為大故莊公始生即書于策鄭突歸而不氏以國陽生入而得係於齊此皆正本以及天下之義也其義苟行無易樹子王室豈有亂離之禍乎春秋書子同生於前而記王室亂於後其為來世法戒明矣

高氏曰春秋記事必指其實下書王猛子朝之事自足見王室

之亂聖人乃於此不隱其辭何哉前此者王室衰微猶未至於亂也故聖人每扶而尊之言王則曰天王不混稱於吳楚也言周則曰京師不下同於列國也王敗於鄭而曰蔡衛陳人從王伐鄭以諸侯不可敵

王故明君臣之大義也王與戎戰而書王師敗績于  
茅戎以夷狄不可抗王故以自敗為文也以至襄王  
出奔而書天王出居于鄭晉侯召王而書天王狩于  
河陽王臣雖微者亦序諸侯之上則所以嚴其名分  
者至矣故凡王室可譏可貶者皆遷就其辭而為之  
隱避今景王不能正其家而致諸子之爭立於是劉  
單立猛尹氏立朝遂以干戈相向迭勝迭負五年之  
間國無定主王室之亂莫此為甚故特書之子頹子  
帶之亂不書景王之亂乃自取之是王室自亂有甚  
於惠襄也陳氏曰周亂不書書王室亂則天下無人  
紀矣昔者惠襄之世子頹亂鄭虢討之子帶亂晉討  
之春秋不書猶有臣子焉耳於是景王崩悼王即位  
既葬矣子朝欲篡悼王而立凡歷悼敬五年而後定  
而訖於佚賊則天下無人紀矣汪氏曰天子以四海  
為家故普天之下天子皆可居之然一家之內自門  
而堂自堂而室室者所常居之所也故春秋書王猛

居于皇天王居于狄泉言天子之所當居也書天王  
出居于鄭言居于所不當居也書王室亂則著其禍  
起於所常居之地也惠襄之世不書王室亂者類帶  
之亂周有君天下有王未足以言亂也景王崩王猛  
未能定其位子朝爭國故特書王室亂○劉氏曰公  
羊云言不及外也非也謂王室亂者嫡庶並爭亂在  
宗室者也本不得言京  
師亂成周亂王城亂耳

### 劉子單子以王猛居于皇

左傳單子欲告急於晉秋七月戊寅以王如平時遂如圃  
車次于皇公羊傳其稱王猛何當國也穀梁傳以者不  
以者也王  
猛嫌也

凡稱以者不以者也

范氏曰不以者本非  
所得制今得以之也  
師而曰以

能左右之也地而曰以能取與之也人而曰以能死  
生之也尊不以乎卑貴不以乎賤夫不以乎小劉蚩  
單旗臣也曷為能以王猛乎猛無寵於景王不能自  
定其位制在劉單其曰以者能廢立之也

孫氏曰言  
劉單以王

猛者猛位未定進退在二子安定胡氏奉王正也以  
王非正臣不宜以君也劉氏曰大不以乎小貴不  
以乎賤君顧可以乎臣哉夫臣者治煩去惑以道事  
君不可則止不挾君之勢而以崇黨者也今劉單之  
為天子臣也君昏則不諫國危則不憂禍已成矣然  
後挾天子以令諸侯此則姦雄之所以冀非望者也  
上下舛逆是謂之以王猛居于皇也大夫之以大夫  
有君命存焉劉單以王猛則專之爾陳氏曰凡以非

予辭也以號公鄭伯晉侯不書以則非予二子也非  
予二子是單旗劉蚩以大夫專廢置君也以大夫專  
廢置君則曷為無貶前言王室亂後言二子以王猛  
居于皇入于王城則二子有不得已焉者而非其罪  
也是故殺子朝於楚儋翩率子朝之徒以作亂敬王  
嘗處于姑蕸逾年克之子朝不書殺天王不書出是  
子單劉以復辟之義也 按左氏景王太子壽以昭十五年卒至

是八年矣猛與勾皆其母弟

杜氏曰太子壽卒王立子猛後復立子朝單劉

以王子猛次正故立之王子勾猛母弟史記景王愛子朝欲立之會崩國人立長子猛子朝攻殺猛晉人攻朝立勾是為敬王汪氏曰杜說猛為次正蓋太子壽之母弟或穆后姊娣之子汪氏曰傳注皆不明言王猛為太子壽之母弟然春秋於猛直稱王而不書立於朝則書立而稱王子於勾則直稱天王則猛勾

與朝嫡庶之分明矣故文定謂猛自皆太子母弟而安定先生則曰太子有母弟者王猛是也敬王又猛弟也吳興沈文伯亦云以意推之太子子猛敬王皆后所生子猛適子之長子朝庶子之長猛當立而朝不當立也禮無疑於當立然而未立者王愛庶子朝欲立

以為嗣未果而王崩故諸大臣競立君諸王子爭欲立以正則有猛以寵則有朝猛雖正而無寵其威不足以懾羣下朝雖寵而不正其分不足以服人心二子廢立皆恃大臣強弱而後定者也故特稱曰以而景王之弱其後嗣輕其宗社之罪亦著矣

李氏瑾曰  
景王立子



而不能定寵不正而不能辨賤宗社之本啓禍亂之  
原莫此為大然則王室之亂非子朝之亂景王自亂  
也易曰王居无咎渙九五象程子曰王居稱居于皇

者明其有土當得位之稱也

襄陵許氏曰易曰王居无咎曰居于皇者春秋

所正也其稱王猛未即位也顧命康王當喪書王而悼王以名繫之者書志事春秋書法也○劉氏曰穀梁云王猛嫌也非也若王猛嫌豈得云居乎

# 秋劉子單子以王猛入王城

左傳劉子如劉單子使王子處守於王城盟百工于平  
宮辛卯鄆肸伐皇大敗獲鄆肸壬辰焚諸王城之市八  
月辛酉司徒醜以王師敗績于前城百工叛己巳伐單  
氏之宮敗焉庚午反伐之辛未伐東園冬十月丁巳晉

籍談荀躒帥九州之戎及焦瑕溫原之師以納王于王城庚申單子劉蚘以王師敗績于郊前城人敗陸渾于社公羊傳王城者何西周也其言入何纂辭也穀梁傳以者不以者也入者內弗受也高氏曰王城天子都而子朝之黨在焉故言入

猛未踰年何以稱王示當立也

陳氏曰武氏子毛伯不稱使則王在喪雖

踰年猶未稱王也此爭立也其遂稱王成猛之為王也猛宜立者也既當立矣何以稱

名明嗣君也曰王猛者見居尊得正又以別乎諸王

子也

茅堂胡氏曰王猛在喪不稱子而稱王明正也書名者別子朝也居于皇入于王城而書猛別

嫌也劉氏曰王猛乃王矣未踰年是以不可稱天王又不可以諸侯例稱子也獨言子則似魯之子冠王

於子又與他王子相亂故稱王繫猛張氏曰以經書魯之法推之天王之喪未葬當稱王子某既葬當稱王子逾年稱王今王猛當稱王子者也適當子朝爭立之際猛雖正而位未定不可以不名故書王猛焉以別嫌而明其正也

君前臣名劉單不名而王名不嫌於倒置

乎曰君前臣名常禮也禮當其變臣有不名名其君

而不嫌者矣王不當稱未踰年而稱王名不當稱立

為君而稱猛

安定胡氏曰王不當稱非王無以定尊位猛不當顯非猛無以明嗣君

皆

禮之變也惟可與權者能知其變而不越乎道之中

再書劉子單子之以王何也春秋詞繁而不殺者必

有美惡焉劉子單子蓋挾天子以令諸侯而專國柄者也書而未足故再書于策以著上下舛逆為後世

之深戒也

張氏曰劉單輔猛苟能如諸葛亮輔後主則必不如是書矣陳氏曰居于皇言失京

師也入于王城言始得京師也汪氏曰劉單當艱難之秋任託孤之寄擁悼立敬其功亦不細矣劉原父及文定公所以責二子者蓋猶霍光驂乘之戒罪其太專無人臣之禮耳茅堂胡氏曰入者難詞也○劉氏曰公羊云其言入何纂辭也若以入為纂下有天王入于成周亦可謂纂乎穀梁云入者內弗受也亦非也必以入為內弗受則天王入于成周亦弗受乎

冬十月王子猛卒

左傳十一月乙酉王子猛卒不成喪也已丑敬王即位  
館于子旅氏十二月庚戌晉籍談荀躒賈辛司馬督帥  
師軍于陰于侯氏于谿泉次于社王師軍于汜于解次  
于任人閏月晉箕遺樂徵右行詭濟師取前城軍其東  
南王師軍于京楚辛丑伐京毀其西南公羊傳此未踰  
年之君也其稱王子猛卒何不與當也不與當者不與  
當父死子繼兄死弟及之辭也穀梁傳此不卒者也其  
曰卒失嫌也杜氏曰未即位故不言崩周人諡曰悼王  
茅堂胡氏曰未踰年不崩不葬卒而加子者正名也孫  
氏曰言王所以明當嗣之人也言子所以見未踰年之  
君也言猛所以別羣王子也不崩不葬降成君也安定  
胡氏曰生則書王明實為嗣死乃稱子正未踰年未成  
天子之至尊臨川吳氏曰子上加王字者表其為天王  
未踰年之子以別於諸侯未踰年之子也劉氏曰未踰  
年則以王繫名通謂之小子王生名之死亦名之明尊  
未成也前書王猛是生名之也此書王子猛是死亦名

之也王氏曰其稱卒雖與王子虎同然書居于皇入于王城則見其正而當立矣陳氏曰未踰年之君雖有謚猶不列於廟次是故衛侯申雖謚曰戴公猛雖謚曰悼王均之為不成君也王猛矣則稱王子猛何於其卒從其恒稱爾春秋之誼苟廢立也足以亂名實則不可弗辨苟非廢立也無亂於名實則弗辨也是故成之為君則稱王猛于其卒也從其恒稱為王子猛不成之為君則稱鄭忽于其歸也從其恒稱為世子忽義不在焉則不沒其實而已矣○劉氏曰公羊謂不與當父死子繼兄死弟及之辭非也向言王猛者以文不可繫子今言王子者死當以子禮治之言卒者未踰年之君猶子赤子般皆言卒也言卒則可言薨則不可不必未踰年之諸侯則稱卒未踰年之王則當稱薨也穀梁云其曰卒失嫌也亦非也謂之小子王卒固當告于諸侯猛未踰年不可言崩又不可言薨是以通言卒耳何嫌之失廬陵李氏曰公穀皆以子猛為篡故卒義不可從

十有二月癸酉朔日有食之

壬敬王  
午元年

二十有三年

晉頃七齊景二十九衛靈十六蔡  
悼三卒鄭定十一曹悼五陳惠十

一杞平十七宋元十三秦  
哀十八楚平十吳僚八

春王正月叔孫婼如晉

癸丑叔鞅卒

汪氏曰叔弓之子輒之  
弟也子詣嗣為大夫

晉人執我行人叔孫婼

左傳邾人城翼還將自離姑公孫鉏曰魯將御我欲自  
武城還循山而南徐鉏丘弱茅地曰道下遇雨將不出

是不歸也遂自離姑武城人塞其前斷其後之木而弗  
殊邾師過之乃推而廢之遂取邾師獲鉏弱地邾人愬  
于晉晉人來討叔孫婼如晉晉人執之書曰晉人執我  
行人叔孫婼言使人也晉人使與邾大夫坐叔孫曰列  
國之卿當小國之君固周制也邾又夷也寡君之命介  
子服回在請使當之不敢廢周制故也乃不果坐韓宣  
子使邾人聚其衆將以叔孫與之叔孫聞之去衆與兵  
而朝士彌牟謂韓宣子曰子弗良圖而以叔孫與其讐  
叔孫必死之魯亡叔孫必亡邾邾君亡國將焉歸子雖  
悔之何及所謂盟主討違命也若皆相執焉用盟主乃  
弗與使各居一館士伯聽其辭而愬諸宣子乃皆執之  
士伯御叔孫從者四人過邾館以如吏先歸邾子士伯  
曰以芻蕘之難從者之病將館子於都叔孫旦而立期  
焉乃館諸箕舍子服昭伯於他邑范獻子求貨於叔孫  
使請冠焉取其冠法而與之兩冠曰盡矣為叔孫故申  
豐以貨如晉叔孫曰見我吾告女所行貨見而不出吏



人之與叔孫居於箕者請其吠狗弗與及將歸殺而與之食之叔孫所館者雖一日必葺其牆屋去之如始至高氏曰晉雖以取邾師為罪而執行人其實則為士鞅來聘以魯為卑已故也胡氏曰晉聽邾人之愬而執叔孫使與邾大夫坐媾以周禮爭之乃不果坐又欲以叔孫與邾人媾去衆與兵臣朝示必死之乃不果與又卻范獻子而拘申豐書執我行人則不所其罪也稱晉人則非伯討也家氏曰叔孫豹會于虢營人訴取鄆將戮之樂王鮒求貨於叔孫使請帶焉豹召使者裂裳帛而與之卒弗與賄媾豹之子也今為晉所執范鞅求貨亦弗與父子所守如此亦可嘉矣魯有賢大夫如此而昭公不與共圖國事坐視強臣之脅制以至於亡悲夫

### 晉人圍郊

左傳春王正月壬寅朔二師圍郊癸卯郊鄴潰丁未晉師在平陰王師在澤邑王使告間庚戌還公羊傳郊者

何天子之邑也昌為不係于周不與  
伐天子也杜氏曰討子朝也郊周邑

按左氏晉籍談荀躒

即狄反

帥師軍于侯氏箕遺樂徵

知陵反

濟師軍其東南正月二師圍郊郊子朝邑也

高氏

曰郊王畿之邑不繫國者天下皆王土也蓋土無二  
王所以別異於諸侯也春秋諸侯更相侵伐未嘗敢  
及于周其心實無王而不敢犯王室者懼天下  
諸侯執言而攻已也此圍郊者子朝在焉故也既不

書大夫之名氏又不稱師而曰晉人微之也所謂以

其事而微之者也當是時天子蒙塵晉為方伯不奔

問官守

手又反

省視器具徐遣大夫往焉勤王尊主之

義若是乎書晉人圍郊而罪自見

音現

矣

茅堂胡氏曰按傳乃助天

王攻子朝也然不書救王又無他褒異之辭與伐天子何別故公羊直以為伐天子也意者王室危亂之甚晉為方伯不躬率諸侯以赴其急伸臣子之義徒以敵者帥偏師薄為之援亂不早定職此之由故不足美也薛氏曰著晉人之不急勤王也東萊呂氏曰當是時王必自以為無假於晉師故使之間而晉因此遂還然晉師還而子朝之勢復熾若因郊潰遂取子朝不至如後日之難也汪氏曰明年晉侯使士景伯涖問周故然後辭王子朝不納其使則是時雖遣師圍郊尚來察於嫡庶是非之辨是以助敬王之不力也○趙氏曰公羊云不與伐天子也此實非伐天子也若實伐周豈為其掩惡哉廬陵李氏曰公羊注以郊為天子間田有大夫主之春秋不與伐天子故不係于周此不知事實者也陳氏曰向者子帶之亂

晉文嘗圍溫矣不書以其討亂也今敬王即位逾年而後圍郊則討亂非晉志也是故貶人之此說極是但圍溫不見經亦未知果與之否

夏六月蔡侯東國卒于楚

茅堂胡氏曰失德不葬若蔡侯東國是也王父殺父見用又奔之失德也高氏曰因朝于楚而卒

秋七月莒子庚與來奔

左傳莒子庚與虐而好劔苟鑄劔必試諸人國人患之又將叛齊烏存帥國人以逐之庚與將出聞烏存執及而立於道左懼將止死苑羊牧之曰君過之烏存以力聞可矣何必以弑君成名遂來奔齊人納郊公

左氏曰庚與虐而好

呼報反

劔苟鑄劔必試諸人國人

患之又將叛齊烏存帥國人逐之庚輿來奔齊人納

郊公

杜氏曰庚輿著丘公之弟郊公著丘公子十四年奔齊

三代之得失天下

仁與不仁而已矣苟無仁心甚則身弑國亡不甚則

身危國削庚輿免死道左而出奔於魯幸耳入國不

書而書其出奔惡

烏故反

之也

高氏曰庚輿不正而立又不安其國而出奔與

鄭突同

郊公出入皆不書微之也所謂以其人而微之

者也

家氏曰郊公在喪不感亂臣持以為過而逐之不能君而可微者也

微之為義或

以位或以人或以事春秋書法達王事名氏不登於

史策若此類亦衆矣

戊辰吳敗頓胡沈蔡陳許之師于雞父胡子髡沈子逞

滅獲陳夏鑿

左傳吳人伐州來楚薳越帥師及諸侯之師奔命救  
州來吳人禦諸鍾離子瑕卒楚師燬吳公子光曰諸侯  
從於楚者衆而皆小國也畏楚而不獲已是以來吾聞  
之曰作事威克其愛雖小必濟胡沈之君幼而狂陳大  
夫蠶壯而頑頓與許蔡疾楚政楚令尹死其師燬帥賤  
多寵政令不壹七國同役而不同心帥賤而不能整無  
大威命楚可敗也若分師先以犯胡沈與陳必先奔三  
國敗諸侯之師乃搖心矣諸侯乖亂楚必大奔請先者  
去備薄威後者敦陳整旅吳子從之戊辰晦戰于雞父  
吳子以罪人三千先犯胡沈與陳三國爭之吳為三軍

以繫於後中軍從王光帥右掩餘帥左吳之罪人  
或奔或止三國亂吳師擊之三國敗獲胡沈之君  
及陳大夫舍胡沈之囚使奔許與蔡頤曰吾君死  
矣師譟而從之三國奔楚師大奔書曰胡子髡沈  
子逞滅獲陳夏齧君臣之辭也不言戰楚未陳也  
穀梁傳中國不言敗此其言敗何也中國不敗胡  
子髡沈子逞其滅乎其言敗釋其滅  
也獲者非與之辭也上下之稱也

吳伐州來楚令尹帥師及諸侯之師與吳戰曷

為不書楚令尹既喪

息浪反

楚師已燔

子偕反杜氏曰火滅

為燔軍之重主喪亡  
故其軍人無復氣勢

六國先敗楚師遂奔是以

不書楚也

劉氏曰疑楚本與諸侯同救州來既而令尹卒楚軍留而諸侯之師先至

吳以詭計勝之楚師實未與吳相接故經不書楚也汪氏曰左傳記令尹卒楚師燬吳光設詐先犯胡沈與陳三國既敗又縱其囚使奔許與蔡頓而許蔡頓之師亦奔六國敗奔之後然後楚師大奔則楚師未嘗與吳師相接明矣高氏曰此見吳之強而楚人益弱夫頓胡沈蔡陳許皆楚與國也吳伐州來楚人師六國之師以救之於是吳人禦之盡敗其師於雞父也

諸侯之師曷為畧而不序頓胡沈則其君自將蔡陳許則大夫帥師言戰則未陳也言敗績則或滅或獲其事亦不同也故總言吳人以詐取勝於前而以君與大夫序六國



於後胡沈書爵書名書滅者二國之君幼而狂  
不能以禮自守役屬於楚悉師以出一敗而  
身與衆俱亡也其曰胡子髡沈子逞滅者若  
曰非有能滅之者咸其自取焉耳亦猶梁亡  
自亡也鄭棄其師自棄也齊人殲遂自殲也  
或曰滅或曰獲別君臣也杜氏曰國君社稷之主與宗廟共其  
存亡者故稱滅大夫君死曰滅胡子髡沈子  
輕故曰獲獲得也逞是也生得曰獲秦晉戰于韓原獲晉侯是

也大夫生死皆曰獲鄭獲宋華元生也吳獲

陳夏齧死也

啖氏曰凡戰而死者君曰滅言與國滅同也生禽曰獲大夫生

死皆曰獲諸侯滅則書名以其死也書其敗不以國分而以君大

夫為序書其死不以事同而以君臣為別皆

所以辨上下定民志雖顛沛必於是也其義

行而亂自熄矣

孫氏曰春秋之戰書敗者多矣未有諸侯之師畧而不序者此六國之師畧而

不序賤其舍中國而與蠻荒故胡子髡沈子逞滅者深惡二國之君不得具死皆以自滅為文也

天王居于狄泉尹氏立王子朝

左傳夏四月乙酉單子取訾劉子取牆人直人六月壬午王子朝入于尹癸未尹圉誘劉佗殺之丙戌單子從阪道劉子從尹道伐尹單子先至而敗劉子還己丑召伯與南宮極以成周人戌尹庚寅單子劉子樊齊以王如劉甲午王子朝入于王城次于左巷秋七月戊申鄆羅納諸莊宮尹辛敗劉師于唐丙辰又敗諸鄆甲子尹辛取西闔丙寅攻蒯蒯潰公羊傳此未三年其稱天王何著有天子也穀梁傳始王也其曰天王因其居而王之也立者不宜立者也朝之不名何也別嫌乎尹氏之朝也

立者不宜立也王猛當立而不能立故稱大臣以之而不言立敬王當立又能立矣故直稱居于狄泉而

不言立

茅堂胡氏曰春秋與敬王者以其為王猛之母弟得繼正統也稱天王者既葬已踰年矣

春秋之法未葬未踰年則不稱王已葬而未踰年亦不稱王已踰年而未葬亦不稱王既葬又踰年則稱王高氏曰敬王始立而遽稱天王者景王崩已踰年矣不可曠年無王故稱之且明正也著天下已有王而子朝不可以亂之也陳氏曰敬王居狄泉在王城之東謂之東王子朝在王城謂之西王書曰天王居于狄泉黜子朝也薛氏曰狄泉不書出在王畿之內也

子朝庶孽奪正以賤妨

貴基亂周室不當立者也故特稱立而目尹氏

杜氏曰尹

氏周世卿也書尹氏立王子朝明非周人所欲立劉氏曰衛人立晉衆人所欲立也不曰公子君位定矣尹氏立王子朝獨尹氏所欲立也已僭位號猶稱王子言莫之君也孫氏曰嗣子有常位不言立立者篡辭高氏曰衛人立晉衆人同欲立猶曰不可今尹氏一已之私而立之以亂周室罪尹氏也尹氏即尹子

此稱氏者著其世執國柄也

尹氏天子之卿也王朝公卿書爵而

變文稱氏者見世卿之擅權亂國為後戒也或曰稱氏者時以氏稱之也詩云王謂尹氏此大雅美宣王詩也亦譏世卿歟為此說者誤矣詩人主文而不以害意有美而或過有刺而或深以意逆之可也春秋所書或稱爵或稱字或稱名或稱氏或稱子或稱人名分所由立是非所由定禮義所由出皆斷自聖心游夏不能與也徇時之所稱而稱之豈其然乎

陸氏曰大

夫稱氏者皆譏世卿也言氏則世卿之意可見矣時世卿既多不可勝譏因尹氏私赴不以名武氏以子代父尹氏立王子朝奔楚皆以世卿亂王室故從而書之譏此數者足以見世卿之惡也陳氏曰書居黜子朝也言尹氏獨尹氏所欲立也將以王天下獨尹氏立之則莫之與也廬陵李氏曰衛晉之立書衛人衆立之詞也子朝之立書尹氏篡立之詞也書衛人而復書公子則嫌於當立書尹氏而不書王子則嫌於外姓此春秋之精意也○劉氏曰公羊意謂未三年不當言天王非也王者雖諒闇三年然踰年之後臣子可以天王稱之矣毛伯求金不稱天王明命自上下不合稱之也天王君于狄泉臣子稱之理自得稱天王也穀梁云朝之不名別嫌乎尹氏之朝也亦非也春秋豈嫌於尹氏之朝哉茅堂胡氏曰穀梁曰朝之不名別嫌乎尹氏之朝也釋者謂據衛人立晉不稱公子竊恐未然衛人既討弑君之賊國無君矣

衆奉晉而立之疑其可也不去其公子則無以明其不當立子朝則異乎是既書王居于狄泉又書尹氏立之則其為篡可知矣固不待去其王子而後明也書王子乃所以見景王寵庶間嫡之失爾

## 八月乙未地震

左傳八月丁酉南宮極震莒弘謂劉文公曰君其勉之先君之力可濟也周之亡也其三川震今西王之大臣亦震天棄之矣東王必大克杜氏曰經書地震魯地也南宮極為屋所壓而死周地亦震也江氏曰王城地震而有子朝之奔魯地震而有陽州之孫天之示人顯矣

## 附錄

左傳楚大子建之母在鄭召吳人而啟之冬十月甲申吳大子諸樊入鄭取楚夫人與其寶器

以歸楚司馬遂越追之不及將死衆曰請遂伐吳以徽之遂越曰再敗君師死且有罪亡君夫人不可以

莫之死也乃  
縊于蘧蒢

冬公如晉至河有疾乃復

左傳公為叔孫故如晉及河有疾而復公羊傳何言乎  
公有疾乃復殺恥也穀梁傳疾不志此其志何也釋不  
得入乎

晉也

昭公兩朝於晉而一見止

汪氏曰五年晉欲止公  
不果十五年晉人止公五

如晉而四不得入焉

汪氏曰二年十二年  
十三年二十一年

今此書有

疾乃復殺恥也

汪氏曰殺猶滅也何氏曰因有疾以  
殺畏晉之恥楊士勛曰公之如晉四

不得入假言有疾實由季孫之不  
入今實有疾別於無疾而反也

以周公之胄千乘



之君執幣帛修兩君之好而不見納斯亦可恥矣有  
恥而後能知憤知憤而後能自強自強而後能為善  
為善而後能立身身立而後能行其政令保其國家  
以昭公內則受制於權臣外則見陵於方伯此正憂  
患疾患有德慧術智保生免死之時也而安於屈辱  
甘處微弱無憤恥自強之心其失國出奔死於境外  
其自取之哉

汪氏曰是時叔孫婁拘囚於晉未有赦命昭公是行本以請婁而中懼晉之不

見納故托疾而返春秋因其託疾而書之以免其不  
得至晉之恥也人臣將命以修聘雖有疾亦不當復

不可壅君命也人君修鄰國之好有疾則不可復既有疾則不得成禮故也

**附錄**

左傳楚囊瓦為令尹城郢沈尹戌曰子常必亡郢苟不能衛城無益也古者天子守在四夷天

子卑守在諸侯諸侯守在四鄰諸侯卑守在四竟慎其四竟結其四援民狎其野三務成功民無內憂而又無外懼國焉用城今吳是懼而城於郢守已小矣卑之不獲能無亡乎昔梁伯溝其公宮而民潰民棄其上不亡何待夫正其疆場修其土田險其走集親其民人明其伍候信其鄰國慎其官守守其交禮不僭不貪不懦不耆完其守備以待不虞又何畏矣詩曰無念爾祖聿修厥德無亦監乎若敖蚡冒至于武文土不過同慎其四竟猶不城郢今土數圻而郢是城不亦難乎

癸敬王  
未二年

**二十有四年**

晉頃八齊景三十衛靈十七蔡昭公申元年鄭定十二曹悼六陳惠

十二杞平十八卒宋元十四  
秦哀十九楚平十一吳僚九

春

附錄

左傳春王正月辛丑召簡公南宮嚳以甘桓公

見王子朝劉子謂萇弘曰甘氏又往矣對曰何

害同德度義泰誓曰紂有億兆夷人亦有離德余有

亂臣十人同心同德此周所以興也君其務德無患

無人戊午王

子朝入于鄆

王二月丙戌仲孫纁卒

汪氏曰孟僖子也子何

忌嗣為大夫是為懿子

叔孫舍至自晉

左傳晉士彌牟逆叔孫于箕叔孫使梁其蹕待于門內曰余左顧而歎乃殺之右顧而笑乃止叔孫見士伯士伯曰寡君以為盟主之故是以久子不腆敝邑之禮將致諸從者使彌牟逆吾子叔孫受禮而歸二月媾至自晉尊晉也穀梁傳大夫執則致致則挈由上致之也

大夫執而致則名

汪氏曰據十四年意如至自晉不書氏

此獨書其姓

氏何賢之也叔孫舍以禮立身而不屈於強國以忠事主而不順於強臣此社稷之衛魯之良大夫也使昭公稍有動心忍性強於為善之意舉國以聽豈其死於乾侯觀意如之稽顙於昭子叔孫之以逐君責

意如

事見左傳  
二十五年

其事可見矣及意如有異志而昭子

使祝宗祈死所謂知其無可奈何安之若命者故舍

至自晉特以姓氏書其死也公雖在外而特書日以

卒之所以表其節為後世勸也

劉氏曰嫗不忍自同於季氏而謀納公正

也不忍見欺於季氏而反自殺忠也故因其可褒而褒之三傳皆無叔孫公羊獨有此似聖人本意所謂辭繫而不殺者也廬陵李氏曰此條胡氏獨取公羊而公羊又無傳疏者以為意如有罪故去其氏叔孫無罪故無貶文其說似是胡氏蓋用臨江劉氏因其可褒而褒之之意

附錄

左傳三月庚戌晉侯使士景伯涖問周故士伯立于乾祭而問於介衆晉人乃辭王子朝不納

使其

夏五月乙未朔日有食之

左傳梓慎曰將水昭子曰旱也日過分而陽猶不克克必甚能無旱乎陽不克莫將積聚也

附錄

左傳六月壬申王子朝之師攻瑕及杏皆潰。鄭伯如晉子大叔相見范獻子獻子曰若王室

何對曰老夫其國家不能恤敢及王室抑人亦有言曰縻不恤其緇而憂宗周之隕為將及焉今王室實蠹蠹焉吾小國懼矣然大國之憂也吾儕何知焉吾子其早圖之詩曰緝之聲矣惟羃之恥王室之不寧晉之恥也獻子懼而與宣子圖之乃徵會於諸侯期以明年

秋八月大雩

左傳  
旱也

丁酉杞伯郁釐卒

附錄

左傳冬十月癸酉王子朝用成周之寶珪于河  
甲戌津人得諸河上陰不佞以溫人南侵拘得

玉者取其玉將賣之則為  
石王定而獻之與之東訾

冬吳滅巢

左傳楚子為舟師以畧吳疆沈尹戌曰此行也楚必亡  
邑不撫民而勞之吳不動而速之吳踵楚而疆場無備  
邑能無亡乎越大夫胥犴勞王於豫章之汭越公子倉  
歸王乘舟倉及壽夢帥師從王王及圍陽而還吳人踵  
楚而邊人不備遂滅巢及鍾離而還沈尹戌曰亡郢之  
始于此在矣王壹動而亡二姓之帥幾如是而不及郢

詩曰誰生厲階至今  
為梗其王之謂乎

巢楚之附庸實邑之也

劉氏曰書曰巢伯來朝巢為諸侯審矣王氏曰巢吳楚間

小國楚取之以為附庸汪氏曰文十三年楚人圍巢則巢猶自為國至襄二十五年吳伐楚門于巢則巢服屬於楚矣書吳入州來著陵楚之漸書吳滅巢著入郢

之漸四鄰封境之守既不能制則封境震矣四境國

都之守既不能保則國都危矣故沈尹戌以此為亡

郢之始也春秋內失地不書

汪氏曰如書取濟西齊取汶陽鄆讎龜陰皆不

書明此為有國之大罪外取滅皆書明見取滅者之



不能有其土地人民則不君矣故諸侯之寶三以土

地為首

家氏曰吳之滅巢能復諸樊門巢之仇故錄之也

葬杞平公

甲敬王  
申三年

二十有五年

晉頃九齊景三十一衛靈十八蔡昭二鄭定十三曹悼七陳惠十三

杞悼公成元年宋元十五年卒  
秦哀二十楚平十二吳僚十

春叔孫婁如宋

左傳春叔孫婁聘于宋桐門右師見之語卑宋大夫而賤司城氏昭子告其人曰右師其亡乎君子貴其身而後能及人是以有禮令夫子卑其大夫而賤其宗是賤其身也能有禮乎無禮必亡宋公享昭子賦新宮昭子

賦車轄明日宴飲酒樂宋公使昭子右坐語相泣也樂  
祁佐退而告人曰今茲君與叔孫其皆死乎吾聞之哀  
樂而樂哀皆喪心也心之精爽是謂魂魄魂魄去之何  
以能久季公若之姊為小邾夫人生宋元夫人生子以  
妻季平子昭子如宋聘且逆之公若從謂曹氏勿與魯  
將逐之曹氏告公公告樂祁樂祁曰與之如是魯君必  
出政在季氏三世矣魯君喪政四公矣無民而能逞其  
志者未之有也國君是以鎮撫其民詩曰人之云亡心  
之憂矣魯君失民矣焉得逞其志靖以待命猶可動必  
憂汪氏曰季孫行父之如陳公孫茲之如牟嬰齊之如  
莒皆因聘而娶託公命以濟其私然皆自逆其妻也今  
意如遣公室之正卿為已逆婦專恣甚矣昔也討私邑  
使公室之卿圍之今也娶已妻使公室之卿逆之則名  
雖為臣而實行魯君之事尚何待昭公孫齊而後專魯  
哉

夏叔詣會晉趙鞅宋樂大心衛北宮喜鄭游吉曹人  
邾人滕人薛人小邾人于黃父

左傳夏會于黃父謀王室也趙簡子令諸侯之大夫輸  
王粟具成人曰明年將納王子太叔見趙簡子簡子問  
揖讓周旋之禮焉對曰是儀也非禮也簡子曰敢問何  
謂禮對曰吉也聞諸先大夫子產曰夫禮天之經也地  
之義也民之行也天地之經而民實則之則天之明因  
地之性生其六氣用其五行氣為五味發為五色章為  
五聲淫則昏亂民失其性是故為禮以奉之為六畜五  
牲三犧以奉五味為九文六采五章以奉五色為九歌  
八風七音六律以奉五聲為君臣上下以則地義為夫  
婦外內以經二物為父子兄弟姑姊甥舅昏媾姻亞以  
象天明為政事庸力行務以從四時為刑罰威獄使民  
畏忌以類其震曜殺戮為溫慈惠和以效天之生殖長

育民有好惡喜怒哀樂生于六氣是故審則宜類以制  
六志哀有哭泣樂有歌舞喜有施舍怒有戰鬪喜生於  
好怒生於惡是故審行信令禍福賞罰以制死生生於  
物也死惡物也好物樂也惡物哀也哀樂不失乃能協  
于天地之性是以長久簡子曰甚哉禮之大也對曰禮  
上下之紀天地之經緯也民之所以生也是以先王尚  
之故人之能自曲直以赴禮者謂之成人人不亦宜乎  
簡子曰軟也請終負守此言也宋樂大心曰我不輸粟  
我於周為客若之何使客晉士伯曰自踐土以來宋何  
役之不會而何盟之不同曰同恤王室子焉得辟之子  
奉君命以會大事而宋背盟無乃不可乎右師不敢  
對受牒而退士伯告簡子曰宋右師必亡奉君命以使  
而欲背盟以干盟主其不祥大  
焉張氏曰黃父即黑壤晉地

按左氏鄭子大叔如晉范獻子曰若王室何對曰王

室之不寧大國之憂晉之恥也吾子其早圖之獻子  
懼乃徵會於諸侯會於黃父謀王室也趙簡子令諸  
侯之大夫輸王粟具戍人將納王夫以王猛之無寵  
單旗劉盩之屢敗敬王初立子朝之衆召伯與南宮  
嚚甘桓公之黨疑若多助之在朝也然會于黃父凡  
十國而諸侯之大夫無異議焉是知邪不勝正久矣  
猶有寵愛庶孽配適奪正至於滅亡而不寤者不知  
幽王晉獻之父子亦何足效哉

汪氏曰幽王愛伯服  
立為太子而黜宜臼

晉獻公寵奚齊卓子而殺申生

然則黃父之會王事也而無美辭何

也王室不靖亦惟友邦冢君克修厥職以綏定王都非異人任亦何美之有免於譏貶足矣此春秋以正待人之體也後世以濫賞報臣子所當為之事為臣

子者亦受而不辭

汪氏曰如漢以宦官誅外戚而封列侯唐以藩鎮平亂而進爵為王

之失此義矣

高氏曰自二十二年景王崩王室亂天類王播越諸侯皆莫奔救四年之後晉始

為此會而諸侯不至但合諸大夫以謀之曰明年將納王夫王室之急如此豈可坐待明年哉有霸者作如齊桓公盟首止以定王世子鄭晉文公誅叔帶以逆襄王豈不美哉桓文不作猛朝相競王室世臣不

能明先王一定之制順非而廢適使頃公而為桓文  
果至是乎是以聖人傷王室之亂而又於此著諸侯  
之無霸也汪氏曰晉頃承世霸之業昏庸怠情畧弗  
克振在位四年僅能兩合大夫而黃父之謀納王既  
不躬帥三軍以造于京師又待來年遣大夫將兵俟  
王室之將定而竊其功至于扈之役欲納昭公于魯  
而蔽於權臣反却宋衛之請蓋是時晉之  
政權全在六卿頃若贅旒而已尚奚責哉

### 有鸛鵒來巢

左傳書所無也師已曰異哉吾聞文武之世童謠有之  
曰鸛之鵒之公出辱之鸛鵒之羽公在外野往饋之馬  
鸛鵒跕跕公在乾侯徵褻與襦鸛鵒之巢遠哉遙遙稠  
父喪勞宋父以驕鸛鵒鵒鵒往歌來哭童謠有是今鸛  
鵒來巢其將及乎公羊傳何以書記異也何異爾非中  
國之禽也宜穴又巢也穀梁傳一有一亡曰有來者來中

國也鸛鵒穴者而  
曰巢或曰增之也

傳曰鸛鵒不踰濟

周禮考工記注不踰濟無妨中國有

濟水東北會于

汶

書禹貢蔡氏傳濟水出絳州垣由縣王屋山東南汶此汶也濟水東北至東平府壽張縣安民亭合

汶水至青州博興縣入海

魯在汶南其所無也故書曰有

顏師古曰公羊

云夷狄禽今之鸛鵒中國有但皆不踰濟水耳故左氏以為魯所常無異而書之

巢者去穴

而巢陰居陽位臣逐君象也

劉向曰象季氏將逐昭公言來者氣所致所謂

祥也何氏曰此權臣欲國自下居上之徵

鸛鵒宜穴處於下而巢居於上

季氏宜臣順於家而主祭於國反常為異之兆能以



德消則無其應矣或曰此公子家有國之祥也

汪氏曰劉

歆云羽蟲之孽其色黑乃視不明聽不聰之罰蓋人反德為亂物反常為妖天地之氣以類相應謹告人君反應甚微而著高宗有雉雉之異謀於忠賢修德正事能禳其災宋有雀生麒麟康王用兵暴虐射天答地尋至殞滅今昭公昏庸視天戒而不知省奔于陽州尚誰懟哉張氏曰邵子曰天下將治則天地之氣自北而南天下將亂則天地之氣自南而北禽鳥之類得氣之先者也鸛鵒不踰濟而至魯豈非氣自南而北之驗哉當此之先楚雖為中國患而齊晉猶足以抑之自此之後晉霸不競吳越皆以南夷迭主夏盟諸侯斂衽事之馴至大亂則知鸛鵒來巢之祥不特昭公出奔之兆而已

秋七月上辛大雩季辛又雩

左傳秋書再雩旱甚也公羊傳又雩者何又雩者非雩也聚衆以逐季氏也穀梁傳季者有中之辭也又有繼之辭也杜氏曰季辛下旬之辛言又重上事啖氏曰季辛不言大承上可知

左氏以再雩為旱甚聖人書此者以志禦災之非道

而區區於禱祠之末也昭公之時雨雹地震四見於

經三年四年大雨雹十年九年二十三年地震旱乾為虐相繼而起三年六年八年

十六年二十四年及此年七書雩有鸛鵒來巢異之甚也季辛又雩

災之甚也考諸列位則國有人焉觀諸天時則猶有

眷顧之心未終棄也若反身修德信用忠賢災異之

來必可禦矣昔高宗彤音融日雉升鼎耳異亦甚矣聽

於祖已克正厥事故能嘉靖殷邦享國長久劉歆曰野鳥自

外來登於宗廟器是繼嗣將易也高宗恐駭宣王之謀於忠賢修德正事能攘其妖致百年之壽

時旱魃蘊隆災亦甚矣側身修行遇災而懼故能興

衰撥亂王化復行此皆以人勝天以德消變之驗也

昭公至是猶不知畏罔克自省而求於禱祠之末將

能勝乎故特書此以為後世鑒廬陵李氏曰春秋書一歲而二烝一月而

再雩皆黷祀也啖氏曰公羊云聚徒以攻季氏按雩但禮官與女巫巫而已何足以攻季氏乎劉氏曰若七

月聚衆則何至九月公乃出奔乎

九月己亥公孫于齊次于陽州

左傳初季公鳥娶妻於齊鮑文子生申公鳥死季公亥與公思展與公鳥之臣申夜姑相其室及季如與饗人檀通而懼乃使其妾扶已以示秦遄之妻曰公若欲使余余不可而扶余又訴於公甫曰展與夜姑將要余秦姬以告公之公之與公甫告平子平子拘展于卞而執夜姑將殺之公若泣而哀之曰殺是是殺余也將為之請平子使豎勿內日中不得請有司逆命公之使速殺之故公若怨平子季郕之雞鬪季氏介其雞郕氏為之金距平子怨益官於郕氏且讓之故郕昭伯亦怨平子臧昭伯之從弟會為讒於臧氏而逃於季氏臧氏執旃平子怒拘臧氏老將禘於襄公萬者二人其衆萬於季氏臧孫曰此之謂不能庸先君之廟大夫遂怨平子公

若獻弓於公為且與之出射於外而謀去季氏公為告  
公果公賁公果公賁使侍人僚相告公公寢將以戈擊  
之乃走公曰執之亦無命也懼而不出數月不見公不  
怒又使言公執戈以懼之乃走又使言公曰非小人之  
所及也公果自言公以告臧孫臧孫以難告邱孫邱孫  
以可勸告子家懿伯懿伯曰讒人以君徼幸事若不克  
君受其名不可為也舍民數世以求克事不可必也且  
政在焉其難圖也公退之辭曰臣與聞命矣言若洩臣  
不獲死乃館於公叔孫昭子如闕公居於長府九月戊  
戌伐季氏殺公之于門遂入之平子登臺而請曰君不  
察臣之罪使有司討臣以干戈臣請待於沂上以察罪  
弗許請囚于費弗許請以五乘亡弗許子家子曰君其  
許之政自之出久矣隱民多取食焉為之徒者眾矣日  
入慝作弗可知也眾怒不可蓄也蓄而弗治將蕙蕙蓄  
民將生心生心同求將合君必悔之弗聽邱孫曰必殺  
之公使邱孫逆孟懿子叔孫氏之司馬黻戾言於其眾

曰若之何莫對又曰我家臣也不敢知國凡有季氏與  
無於我孰利皆曰無季氏是無叔孫氏也穀戾曰然則  
救諸帥徒以往陷西北隅以入公徒釋甲執冰而踞遂  
逐之孟氏使登西北隅以望季氏見叔孫氏之旌以告  
孟氏執郈昭伯殺之于南門之西遂伐公徙子家子曰  
諸臣偽劫君者而負罪以出君止意如之事君也不敢  
不改公曰余不忍也與臧孫如墓謀遂行已亥公孫于  
齊次于陽州穀梁傳孫之為言猶孫也諱奔也次止也

內出奔稱孫隱也

家氏曰季氏逐君而以自孫自次為文者譏公有以自取也

于陽州待齊命也

杜氏曰陽州齊魯竟上邑未敢直前故次于竟陳氏曰公行書次自

莊以來未之有也于是再見以昭昭公欲伐季氏子  
公之失國不可不詳其所如往也

家子曰季氏得民久君無多辱公不從意如登臺而

請待於沂上以察罪弗許請囚于費弗許請以五乘  
亡弗許子家子曰君其許之政自之出久矣隱民多  
取食焉為之徒者衆矣日入慝作弗可知也弗聽叔  
孫氏之司馬陷西北隅以入孟氏殺邱昭伯遂伐公  
徒公與臧孫如墓謀杜氏曰辭先君且謀所奔遂行以君伐臣曷  
為不勝魯自東門遂殺適立庶魯君於是乎失政祿  
去公室政在季氏於此君也四公矣作三軍盡征其  
一舍中軍兼有其二民賦入於其家坐矣受命救台

也遂入鄆帥師取卞也不以聞軍政在其手專矣行

父片言而東門氏逐南蒯一動而公子慙奔魯之羣

臣亦無敢忠於公室而獻謀者所謂屯難之時也在

易屯之六五曰屯其膏小貞吉大貞凶

程子曰人君之尊雖屯難

之世於其名位非有損也唯其施為有所不行德澤

有所不下是屯其膏既膏澤有所不下是威權不在

已也威權去已而欲驟正之求凶之道魯昭公高貴

鄉公之事是也故小貞則吉小貞則漸正之也若盤

庚周宣修德用賢以

象曰屯其膏施未光也

程子曰膏澤不

下及是其德施

未能光大也昭公不明乎消息盈虛之理正身率



德擇任忠賢待時馴致不忍一朝之忿求逞其私欲

而以羣小謀之其及也宜矣

東萊呂氏曰使叔孫昭子而在則昭公必不至

孫也汪氏曰秦之趙高專政權者三世廢置其君在其掌握而子嬰庸弱尚能討之而夷其三族昭公君千乘之國二十有五年討一季氏不克而出奔者何哉即位雖久而民不見德則無德也以叔孫舍子家駒之賢而不能專任以聽其言則無人也臧孫及子家子皆以為為不可不能修政蓄備而遽信羣小之言以圖之則無謀也公徒釋甲執冰而踞莫有鬪心則無兵也四者無一焉而奮然怒螳螂之臂以當車轍其不為曹髦之刃出於背者幸而免爾使昭公果能修德用賢俟其信孚於人而援之者衆然後審謀治兵一舉而戮巨姦其誰曰不濟苟恬然不為而終於亡亦何足取哉

# 齊侯唁公于野井

左傳齊侯將唁公于平陰公先至于野井齊侯曰是寡人之罪也使有司待于平陰為近故也書曰公孫于齊次于陽州齊侯唁公于野井禮也將求於人則先下之禮之善物也齊侯曰自莒疆以西請致千社以待君命寡人將帥敝賦以從執事唯命是聽君之憂寡人之憂也公喜子家子曰天祿不再天若胙君不過周公以魯足矣失魯而以千社為臣誰與之立且齊君無信不如早之晉弗從臧昭伯率從者將盟載書曰戮力壹心好惡同之信罪之有無繿繿從公無通外內以公命示子家子子家子曰如此吾不可以盟羈也不佞不能與二三子同心而以為皆有罪或欲通外內且欲去君二三子好亡而惡定焉可同也陷君於難罪孰大焉通外內而去君君將速入弗通何為而何守焉乃不與盟公羊傳唁公者何昭公將弑季氏告子家駒曰季氏為無道

僭於公室久矣吾欲弑之何如子家駒曰諸侯僭於天子大夫僭於諸侯久矣昭公曰吾何僭矣哉子家駒曰天設兩觀乘大路朱干玉戚以舞大夏八佾以舞大武此皆天子之禮也且夫牛馬維婁委已者也而柔焉季氏得民衆久矣君無多辱焉昭公不從其言終弑而敗焉走之齊齊侯唁公于野井曰奈何君去魯國之社稷昭公曰喪人不佞失守魯國之社稷執事以羞再拜顙慶子家駒曰慶子免君於大難矣子家駒曰臣不佞陷君於大難君不忍加之以鉄鎖賜之以死再拜顙高子執簞食與四脰脯國子執壺漿曰吾寡君聞君在外餒饔未就敢致糗于從者昭公曰君不忘吾先君延及喪人錫之以大禮再拜稽首以社受高子曰有夫不祥君無所辱大禮昭公蓋祭而不嘗景公曰寡人有不腆先君之服未之敢服有不腆先君之器未之敢用敢以請昭公曰喪人不佞失守魯國之社稷執事以羞敢辱大禮敢辭景公曰寡人有不腆先君之服未之敢服有不腆

先君之器未之敢用敢固以請昭公曰以吾宗廟之在魯也有先君之服未之能以服有先君之器未之能以用敢固辭景公曰寡人有不腆先君之服未之敢服有不腆先君之器未之敢用請以饗乎從者昭公曰喪人其何稱景公曰孰君而無稱昭公於是噉然而哭諸大夫皆哭既哭以人為蓄以幣為席以輦為几以遇禮相見孔子曰其禮與其辭足觀矣穀梁傳弔失國曰唁唁公不得入於魯也孫氏曰野井齊地

唁者弔也生事曰唁

趙氏曰弔生曰唁詩歸唁衛侯

死事曰弔齊侯

唁公于野井

高氏曰凡唁皆造其所居其曰于野井者齊侯將唁公公自陽州逆之蓋為恭

也 以遇禮相見

杜氏曰遇者草次之禮若道路偶相邂逅齊景以昭公失國故簡其禮不

以會禮相見

孔子曰其禮與其辭足觀矣然則何以失國

而不反乎禮有本末正身治人禮之本也威儀文辭

禮之末也昭公喪齊歸無感容而不顧

見左傳  
十一年

娶孟

子為夫人而不命

禮記雜記夫人之不命於天子自昭公始以娶同姓不敢告天子

政令在家而不能取有子家子而不能用而屑屑焉

習儀以亟能有國乎雖齊侯來唁其禮與辭是矣而

方伯連帥之職則未修也又豈所以為禮哉其言曰

自莒疆以西請致千社

杜氏曰二十五家為社千社二萬五千家欲以給公將

率敝賦以從而子家子曰失魯而以千社為臣誰與

之立且齊君無信不如早之晉書曰唁公亦明其無

納公之實譏之也

孫氏曰唁慰安之辭齊大國也不能討意如于魯國徒能唁昭公于

野井此齊侯之惡亦可見矣石氏曰觀齊侯致餒饗之禮與昭公喪人之稱則其為禮不誠其辭不哀可

見矣任氏曰公孫于齊求齊之援也次于陽州侯齊之命也齊侯唁公于野井以唁為名拒公之適已也

昭公微弱季氏盛強迫脅而出欲求救拯以齊大國之力伐季氏至易也為君而伐臣至順也行至易以

成至順速若發麴惜乎齊景不知為此野井之唁豈弔失國之禮乎拒公而已家氏曰書齊侯唁者再非

與其能唁也譏其無救災恤患之實也徒行虛禮而誠不在焉廬陵李氏曰經書唁者三皆所以罪齊晉

忘大義而

崇微禮也

冬十月戊辰叔孫婁卒

左傳昭子自闕歸見平子平子稽顙曰子若我何昭子曰人誰不死子以逐君成名子孫不忘不亦傷乎將若子何平子曰苟使意如得改事君所謂生死而肉骨也昭子從公于齊與公言子家子命適公館者執之公與昭子言於幄內曰將安衆而納公公徒將殺昭子伏諸道左師展告公公使昭子自鑄歸平子有異志冬十月辛酉昭子齊於其寢使祝宗祈死戊辰卒左師展將以公乘馬而歸公徒執之家氏曰繼公孫而書舍卒言舍之為公死也王氏曰春秋賢臣憂國而祈死者二晉范文子以厲公無道慮國難之將作魯叔孫舍以昭公失國憤意如之見欺皆愛君憂國之至因禱以自裁也是時昭公在外特書日以卒之所以錄君臣之恩表其節為後世勸汪氏曰舍子不敢嗣為大夫是為叔孫成子廬陵李氏曰劉氏曰婁不忍自同於季氏而謀納公正

也不忍見欺於季氏而反自殺忠也然顏子曰子在回何敢死昭公在外姑可以無死此春秋所由不以死褒姑也姑之死雖不可以當褒而其忠也不可忘矣故于其至自晉而褒之傳曰苟志於仁矣無惡也此之謂也胡氏主此說夫昭公之禍原於叔孫氏之司馬昭子既歸倘正黷戾之罪而誅之亦庶足以翦季氏之羽翼而徐為之圖今乃付之無可奈何之命不及甯俞遠矣此意林所為不滿也然祈死之說本不可信此年春昭子在宋與元公對語而泣樂祁已知其魂魄去矣何待於祈哉

附錄

左傳壬申尹文公涉于鞏焚東訾弗克

十有一月己亥宋公佐卒于曲棘

左傳十一月宋元公將為公故如晉夢太子欒即位於廟己與平公服而相之旦召六卿公曰寡人不佞不能



事父兄以為二三子憂寡人之罪也若以羣子之靈獲保首領以沒唯是編紉所以籍幹者請無及先君仲幾對曰君若以社稷之故私降昵宴羣臣弗敢知若夫宋國之法死生之度先君有命矣羣臣以死守之弗敢失隊臣之失職常刑不赦臣不忍其死君命祗辱宋公遂行己亥卒于曲棘公羊傳曲棘者何宋之邑也諸侯卒其封內不地此何以地憂內也穀梁傳郊公也杜氏曰曲棘宋地陳留外黃縣城中有曲棘里

按左氏宋元公為公故如晉卒于曲棘曲棘宋地也宋元之夫人曹氏生子妻意如或謂曹氏勿與魯將逐之曹氏告元公公告樂祁祁曰與之如是魯君必出無民而能逞其志者未之有也魯君失民久矣然

則宋元意如之外舅也不此之願而求欲納公是以正倫恤患為心而不匿其私親之惡者也其賢於當時諸侯遠矣故雖卒于封內而特書其地以別之也

劉氏曰諸侯有方伯連帥分災救患扶傾濟弱誅叛討亂王政之所急仁義之本也諸侯卒其竟內猶大夫之卒其家未有言其地者而佐卒獨見以其有親附鄰國憂諸侯之心也家氏曰齊晉二大國坐視季氏逐君恬不加省而宋元特為此行將以其前日逐華向者而討魯之強家非能視天下之惡猶已之惡豈能及此春秋書其卒于行錄之也

十有二月齊侯取鄆

左傳十二月庚辰齊侯圍郕公羊傳外取邑不書此何以書為公取之也穀梁傳取易辭也內不言取以其為公取之故易言之也

鄆魯邑也直書齊侯取之何也齊不自取而為公取

鄆使居之也昭公出奔經書次于陽州見公於魯未

絕而季氏逐君為不臣

汪氏曰經書諸侯失國出奔皆不言次獨昭公之孫特言

次于陽州是昭公雖為季氏所逐而未見絕於國人故次止於齊魯之境而謀獲國也

及書齊

侯取鄆則見公已絕於魯而逐於季氏為不君

汪氏曰晉

平公使魏舒逆衛獻公使衛與之夷儀則書衛侯入于夷儀不言晉取夷儀也齊高偃納北燕伯于陽亦

不言齊取陽也今書齊侯取鄆于公至自齊居于鄆之上則是國內之人皆叛無有愛念之者非假鄰國之力以取邑則鄆人不

受命而無所於居矣君者有其土地人民以奉宗

廟之典籍者也已不能有而他人是保則不君矣春

秋之義欲為君盡君道為臣盡臣道各守其職而不

渝也昭公失君道季氏為亂臣各渝其職而不守矣

其為後世戒深切著明矣

呂氏曰齊侯不能討季氏以正君臣大義而獨取鄆

以處公其無意於善而忽遠畧可知也陳氏曰外取邑不書雖取諸我不書取鄆以居公則何以書病齊侯也齊侯將納公以梁丘據一言而遂不果鄆陵之盟合諸侯徒曰納公三年而無成則是取鄆而已矣


是故取鄆則書齊圍成則書公家氏曰是時晉政已衰霸權未有所屬齊景有志修桓公之業當請命天王號召與國納昭公于魯戮意如以示天下而霸政舉矣乃以取鄆為首務姑塞已責勇於義者不爾或謂嘉其取鄆故爵之此目其人以貶之爾矣其爵汪氏曰不書諸侯伐圍以討逐君之臣但志取鄆與外取田邑同文而不異其辭則齊景仗義之功未矣廬陵李氏曰胡氏之說本程氏呂氏以為譏齊侯之忽遠略者亦得之謝氏曰言之矣而不能為之討賊居之矣而不能為之復國齊侯之罪也然書齊侯則異乎洛西謹闡之取書人矣故意林以為齊侯有修伯討不登叛人之意

**附錄**

左傳初臧昭伯如晉臧會竊其寶龜僂句以卜為信與僭僭吉臧氏老將如晉問會請往昭伯

問家故盡對及內子與母弟叔孫則不對再三問不對歸及郊會逆問又如初至次於外而察之皆無之

執而戮之逸奔邱邱鮪假使為賈正焉計於季氏臧氏使五人以戈楯伏諸桐汝之閭會出逐之反奔執諸季氏中門之外平子怒曰何故以兵入吾門拘臧氏老季臧有惡及昭伯從公平子立臧會會曰僕句不余欺也○楚子使蓬射城州屈復茹人焉城丘皇遷訾人焉使熊相謀郭巢季然郭卷子太叔聞之曰楚王將死矣使民不安其土民必憂憂將及王弗能久矣



春秋大全卷三十二